

# KOLITI Napa 1

## Polu koyoto epi'ehina fayahi

**1** <sup>1-2</sup> Hu'mamofihu ai ka'alo Yesu Kilisitohi aposolo lolo hilane luto nele'mo eto hu'ehina bo Poluita nani'ni ya'ma lalalutifu Sosetenit hiti moneka nohutot'i'a Koliti hepatoga Hu'mamofihu naga'i lenalitoga fayaha nasana ya'ma koyoto nolepu'ibe. Lenali Yesu Kilisito lenele'mo bati higo Hu'mau bona'i minalabe luto elesa molo lepi'ehina. Lenali hiti to noto notomagi hiti Sipi Bo Yesu Kilisitohi gi'a kumu kehelilo li pili ke'ahana bona'i enali hiti moneko elesa molo lepi'ehina. Yesu ai enali sipi bo'ani hiti lali sipi boti hiti nohinagihe.

<sup>3</sup> Afotifu Hu'mamofihu aitogati to Sipi Boti Yesu Kilisitohi aitogati lenehe'mose'na to fuluna'a lenalitoga mino moloto mineno.

### Koliti bonatoga mono'mofihi amuya'a huto hu'ehina'mu foke ka lu'ehina

<sup>4</sup> Hu'mau ai Yesu Kilisito kumu yabe luto lenehe'mose'na lenele'mo hetofa hu lepolo'ehina'mu nani lenali kumu luto keheliloto kana'amu kana'amu Hu'mamofihu foke ka lulata nohubo. <sup>5</sup> Ai Hu'mau ka keta mehuse lu huto hulatana to kehelise'na fato fato nasanatu lenele'mo hetofa hu'ehigo mono'mofihi mina'a babu luto li'ahana'a ya'ma ni'ibe. <sup>6</sup> Kilisitohi kaga'auba komopatinigu ule'ale huto fuluna'a huto hu'ehina. <sup>7</sup> Ya'mu lenali fa'mene Sipi Boti Yesu Kilisito alihia metoga huto hilina'mu geba hite nehite Hu'mamofihu kamofihu legeya'a mone lenebe meligise lenalitoga ahuto hu baga i'ehina yabe. <sup>8</sup> Ai ya'ma Sipi Boti Yesu Kilisito henetilina kanalo foipanatini meminenogo to lufusatini amuya malago minalabe luto kaba hu lepoloba lepoloba nohinogo kanatini su halibe. <sup>9</sup> Hu'mamofihu pana'a Yesu Kilisito lali Sipi Boti ya'ma aitoga i ke'malababe luto elesa molo lepilina yana'mu ai hetofa hu lepalalina'a akeheli'ohune.

### Koliti bona'i enali mono kumu lite loko luku hi'ahana

<sup>10</sup> Nalalu'nigitabe. Nani Sipi Boti Yesu Kilisitohi gi'alo yabe luto lu hokolo hu lepito ya'ma lilugi, kehelilo. Lenali kaga fato fato'i nelite loko

mehilo mono ka'mu nekehelite lengekesa hiti komopatini le'mo moneko hite minalo. <sup>11</sup>Na'o bogiyo. Nani folagahatinigu kenasabo bise ka huto nohina ya'ma Koloehi bona'amagi lago keheli'ohuna ya'ma lu nolepube. <sup>12</sup>Ya hu'ehina'mu ka'a ma luto nolube. Lenalitogati luga'amagi lali Poluhi naga'i nohune lite lilata nehabe. Ya lite nelago luga luga'amagi lali Apolosihi naga'i nohune lite lilata nehabe. To luga'amagi lali Pitaha naga'i nohune lite lilata nehabe. To luga'amagi lali Kilisitohi naga'i nohune lite lilata nehabe. <sup>13</sup>Yamofifi hena hena hu'ehibe? Enali Kilisitohi loko hi'ahago pana'alobomagiji hiti loko hi epele'ahana ni'ifihe? To Poluita, nani lenali kumu yabe luto malipu yafalo fili'ohufihe? To Poluita nani nigi'niuba ho hauta holago mono nagami'i fele'ahafihe? Ya huto meni'ibe.

<sup>14</sup>Nani lama'naka mono nagami'i mefolo lepolo'ohunamo ni'inagihe. Ya hu'ehina'mu komopa'nigu bati nohube. Bo loemo Kilisipoko Gaiyasiko hiti etalisigo folo etoto'ohunamo ni'ibe. <sup>15</sup>Lenali ya lite li lalabe luto: Ai gi'auba ho hauta lahago mono nagami'i folo'ohutamo ni'ibe. Lenali ya'ma lu lalabe luto nolube. <sup>16</sup>To mone ma luto nokehelube. Setefanohi bona'a enali hiti folo epolo'ohuna luga'a enali kumu mekehelube. <sup>17</sup>Kilisitou ai naga'a mono nagami'i folo epalalane luto noho melifi'ehibe. Ai ka'a lamana'a lu huto huto hu epilane luto lu neto'ehinamo ni'ibe. To ana huto Kilisitou ai melugu bona'magi nelana ka lu epilane luto noho melifi'ehibe. To hena'mube? Ya'ma nelana kagauba Kilisitou malipu yafalo fili'ehina kagamofifi amuya'a limi lalibe luto yabe.

### Kilisito ai Hu'mamofifi felisa to kehelise'na'a ni'ibe

<sup>18</sup>Kilisitohi kaga'a amuya'a amuya'a hiti ni'igo yana'mu ma kehelilo. Malipu yafalo fili'ehina kaga'a ya'ma kegeiyo bona'magi fililana kapogu melelata nehana nekehelite negi nasana yabe lite nelanaya to lali'i kapo lamana'agu nobuta bona'magita kehelutogo Hu'mamofitogati amuya'a kaga ni'ibe luto keheli'ohune. <sup>19</sup>Yanana'mu mono bukugu Hu'mau lu'ehina ka mone ma luto fayah koyo'ehinamo ni'ibe:

Nani enali kehelise'nati  
bati hu'ehibe lite  
nelana bona'magihi  
kaga'ani ho laga hinogo  
limilina'mu yabe.  
To kehelise'nati ni'ibe lite  
neminana bona'magihi  
kehelise'na'ani yamofifi  
keheli he'miluna'mu yabe.

<sup>20</sup>Ya'mu kehelise'nati ni'ibe lite neminana bona'i hiya'a hite minalabe? To mono kamofifi keheli akeheli nohune lilata nehana bona'i hiya'a hite

minalabe? To yatai kanamofiji hapa'amu kaga foya lilana bona'i hiya'a hite minalabe? Hu'mau ai'a bona'magi kehelise'na'ani fa'mene kaga ni'ibe luto keheli'ehina yabe.

<sup>21</sup> Ya'mana hapa'a ma ni'ibe. Hu'mau kehelise'na'a amuya huto nohigo bona'i enali'ani kehelilata nehana yanatu Hu'mamofiji hapa'a bu galune lite alune'mu bati mehi'ahana. Ya'mu Hu'mau keheligo bati higo Kilisito fili'ehina ka'a lu epise'na ya'ma bona'magi kehelite negi nasana yabe lite nelana'a ya'ma bona'i luga'a lu epugo kehelite aitoga agoya hu emilune lite fifa neigo Hu'mau enubuto bilata nohibe. <sup>22-23</sup> Yuta naga'magi enali ya'ma ka kehelilune lite topa hose nasana hulengo bu galune lite amuya nehabe. Giliki bona'i ana hite enali ananamofiji hapa'a kehelilune'mu nelite sa sa nehitte kupomo'i fite minelata nehabe. Ya nehanaya lali ya'ma Kilisitohi malipu yafalo he'ahanamofiji kaga lunogo Yuta bona'magi enali keheligo keta hulata nohibe. To Giliki bona'i enali kehelite negi ka yabe lite lilata nehabe. <sup>24</sup> Ya nehanaya lali Hu'mau lele'mo'ehina bona'magita Yuta bona'i nohuta Giliki bona'i hiti nohuta laliya Kilisito kumu nokeheluta ya'ma Hu'mamofiji felisa to kehelise'na'a ni'ibe luto nokehelune. <sup>25</sup> Bona'magi enali Hu'mamofiji foya'mu Kilisito malipu yafalo fili'ehina ya'ma negi nasana ni'ibe lite nelago ana Hu'mamofiji negi nasanauba bona'magihi kehelise'na'ani be ligilata nohibe. To Hu'mamofiji foya'mu amuya'a meni'ibe lite nelago ya'ma Hu'mamofiji amuya meni'ina nasanauba bona'magihi amuya'ani be ligilata nohibe.

<sup>26</sup> Nalalu'nigitabe. Hu'mau lali hena legit bona'i elesa molo lepi'ehinamo ni'ibe? Beto hite kehelilo. Asaga bona'magihi lenali kumu hetofa kehelise'na'ani hiti keheli fe lite mine'ahana'a babu lite nehabe lite nelafiye? O'e ya menelabe. To amuya bona'i lenalitoga babu lite nehabe lite nelafi? Ya menelabe. To ana huto lenigi hite nehana'amagihi lenalitogati babu lite nehabe lite nelafi? Ya menelabe. <sup>27</sup> Ya nehanaya bona'magihi enubulo kehelise'na'ani bati mehina'a lali Hu'mau lele'mo'ehina yabe. To bona'magihi enubulo amuyati menina'a lali Hu'mau lele'mo'ehina yabe. Hena'mube? Enali kehelise'nati bati hu'ehibe lite to amuya hiti nohune lite lilata nehanamagi enubuya'ani hulata hilabe luto yabe. <sup>28</sup> To bona'magihi enubulo limite nehana'a ya'ma Hu'mau elesa molo epilata nohibe. Hena'mube? Bona'magihi enubulo enikibina lolo hite mina'ahana'a hiti to fa'menena'a hiti enali Hu'mau lukesa'ani sigilata hilabe luto enele'mo laba hilina'mu yabe. <sup>29</sup> To ya higo melugu bona'i moneuba Hu'mamofiji bulo gufa'a limo titi lalibe luto ya suhi hu'ehina ni'ibe. <sup>30</sup> Ya hu'ehinaya Hu'mau lali Yesu Kilisitotoga lele'mo hepi'ehina yabe. Kilisitou ai ya'ma lali Hu'mamofiji ka'a keheli bebe salutamofiji hapa'a minalibe luto yabe. To ai Hu'mamofiji gobisalo mino fu luto minalutamofiji hapa'a minalibe luto, to foipanati li he'mi letelenogo komopati gulu gulu linogo minalutamofiji hapa'a minalibe

luto yabe. To ai Kilisitou lali'i foipanaguti gulu ho letalibe luto yabe.

<sup>31</sup> Ya'mu kaga mone mono bukugu ma lite fayah keye'ahana ya'ma ule'ale hilibe: *Lenali fokehi lilune'mu nehana bona'magi Sipi Botiuba hu lepolo'ehina'amofifi fokeha'a lilo.*

### Polu Kilisitohi he'ahanamofifi ka'a beto hu epi'ehina

**2** <sup>1</sup>Nalalu'nigita nani lenalitoga neheti'ohunamo ya'ma Hu'mamofifi suguna ka'a lu lepilube luto ya'ma kehelise'na'ani bati hu'ehina bona'magih i kaga lilata nehana supo huto laga hina ka lu melepi'ohube. <sup>2</sup>O'e. Nani ma luto keheli amuya mololoto bu'ohunamo ni'ibe. Nani lenalitoga buto nohuto'ni kaga lug'a melu'ohuna yagi Yesu Kilisito ai kumu hiti to malipu yafalo he'ahana yamofifi ka'asigo beto hu lepilube luto keheli'ohunamo ni'ibe. <sup>3</sup>To lenalitoga foiya bito nehetilube'mu nohuto laga lepesifi melepesifi luto mino'ohuna ya'ma amuya'ni meni'igo nefelele'i bigo afoya ito mino'ohunamo ni'ibe. <sup>4</sup>Ya huto nohuto Hu'mamofifi kaga lu'ohuna lengekesa lilube luto metoga bona'magi kehelise'na'ani ni'ina kagaguti lenimi molose ka lu melepi'ohube. Hu'mamofifi amuya'auba to Sikalafu'uba nani'i kaga'ni le'mo hetofa hu'ehigo legeya'a lolo hulata hu'ehibe. <sup>5</sup>To ya higo lenali Hu'mamofifi kumu keheli amuya malalana yanauba bona'magi keheli fe lilata nehana yamofifi meni'ibe. O'e, Hu'mamofifi amuyalo lenifita ilabe luto ya hu'ohunamo ni'ibe.

### Hu'mamofifi suguna ka'a Sikalafu'uba lu huto hulata nohibe

<sup>6</sup>To ya huto ni'inaya nani ka keheli bati mehuse liluta ni'ifihe? O'e. Nani lama'naka Hu'mamofifi kagu hofa tete mine'ahana bona'amagi ya'ma keheliya ito kagaguti lu lepilata nohube. To ya nohutaya ya'ma metoga enighiti bona'i fililete fa'menena lolo hilanamagi keheli fe lite kaga lilata nehana ya suhi huto liluna'a meni'ibe. <sup>7</sup>O'e, nani keheli bati huto lulata nohuna'a Hu'mau koyapa'i komopa'agu suguna huto keheli molo'ehina yamofifi lu huto hulata nohube. Keheli molo'ehina ka'a ya'ma bona'magita lali Hu'mamofifi fana meha'agu minalune luto koyapa'i ana'ina li huto mehina yupahi Hu'mau le'mo keta mehuse huto molo leto'ehina. <sup>8</sup>Metoga enighiti bona'magi enali anamofifi keheli molo'ehina kagamofifi hapa'a mekeheli'ahabe. Kehelitita yamofifi lali Sipi Bomofifi fana mehenamofifi afo'afihi ya'ma malipu yafalo mehatita'mu yabe. <sup>9</sup>Ya hu'ehina'mu kaga mone ma lite mono bukugu fayah keye'ahana ni'ibe:

Bona'magi bu mege'ahana  
to enegekesatu mekeheli'ahana nasana,  
to bona'magih i komopa'anigu  
mekeheli'ahana nasana,

ya'ma Hu'mamofihu  
 komopa'ani emi'ehilana bonatoga  
 le'mo huto hilina'mu yabe.

<sup>10</sup> Ya nasana'amu Hu'mau ai Sikalafu'a ho lifigo oto lu huto hu limilata nohibe. Ana Sikalafu'uba silaga bona'magihi komopa'anigu to Hu'mamofihu komopa'agu fala kito ni'in'a hiti kehelilata nohinagi ya'ma lu hokolo hu leto'ehibe. <sup>11</sup> Hiya boubab ya'ma lalu'afahi komopa'amofihu hapa'a keheli'ehibe? Komopa'amofihu afo'afu ai'asigo kehelilina'mu yabe. Ana huto Hu'mamofihu komopa'amofihu hapa'a ya'ma Hu'mamofihu Sikalafu'uba moneko ai'a kehelilina'mu yabe. <sup>12</sup> To lali ma melugu bona'magihi sikalafu'i meli'ohutamo ni'ibe. Lali Hu'mau mono ka molo leto'ehina yamofihu keheli fe lilune luto Hu'mamofihu Sikalafu'a li'ohutamo ni'ibe.

<sup>13</sup> To ya higo lali'i bona'i luga'a Hu'mamofihu Meha'a li'ahanamagiji ai ka'a lu keheli huto lu epiluta nohuto lali bona'magi keheli'ahana ka lu epiluta meni'ibe. Lali Hu'mamofihu Sikalafu'uba lu limilina ka'asigo lulata nohune. <sup>14</sup> Bona'i luga'a Hu'mamofihu Sikalafu'a hiti menehilana bona'i enali ya'ma Hu'mamofihu Sikalafu'mofihu kaga'a mone mekehelilana'mu yabe. Enali hena hite kehelilabe? Meni'ibe. Sikalafu'i hiti nehilana bona'magi kehelilana'a huto ni'inaya, Sikalafu'i hiti menehilana bona'magi kehelinogo fa'mene kaga legi lolo hilube'mu hibe. <sup>15</sup> Lali hetofa Sikalafu'i hiti nohiluna bonago nasana asaga'i fa'mene bu go fe lilana'a ni'inaya bo moneuba enali hapa hapa'ani lu huto mehilube'mu higo keheli bati menehabe. <sup>16</sup> Ya hu'ehina'mu kaga ma lite keye'ahanamo yamofihu lamana'a ni'ibe:

Sipi Bomofihu komopa'agu kaga ni'inaya  
 yamofihu bo mone  
 ki'afu kehelilina ni'ibe?  
 Kaga'ago noligo  
 ya'ma hiya boubab le'mo bati higo  
 lu'ehina ni'ibe?  
 Mone meni'ibe.

Mone meni'inaya lali ya'ma Kilisitohi kehelise'na'a lu huto hu letago nominone.

### Bona'i Hu'mamofihu foyalo bona'a lolo hite nehana

**3** <sup>1</sup> Nigibo nalalu'nigitabe. Ya'ma kaga lu lepi'ohuna'mu nani lenalitoga ma melugu bona'i kehelise'na'ani hiti lu epilata nohuna'a ana suhi huto lepi'ohube. Lenali mono kagu amuya memelese Kilisitohi lagaso yagapan'a'i inapu tegi hite nehago nani Hu'mamofihu Sikalafu'a hiti menehana'a lu epilatamofihu ya'ma lu lepi'ohube. <sup>2</sup> Nani komopatinimofihu amuya nose'na melepise fa'mene amipo lepi'ohunamo

tegi huto ni'ibe. Komopatinimofahi amuya nose'na ya'ma hiya hite nalabe? To lenali yatai ya'ma nose'na amuya nalana bona'magihi legegeto menehabe. Lagaso yagapana tegi hite neminabe. <sup>3</sup>Lenali koyapa'i mine'ahana legegeto fa'mene nehabe. Lenali ai siko higo ai siko higo nehite luba sabo hite fa'mene bona tegi hite mine'ahana suhi hite ya'ma hapa'amofahi huto huto ni'igo koyapa lenemehiti minelata nehabe.

<sup>4</sup>Lenali luga'amagi Poluhi bona'a nohune lite nelago to luga'amagi Apolosihi bona'a nohune lite nelana bona'i ya'amagita lenali kumu fa'mene melugu bona'i suhi hite nehabe luto lu lepalaluna'mu yabe.

<sup>5</sup>Lenali lali'i henabe lite loko hilata nehabe. Apolosi hiti Polu hiti le'ali fa'mene Hu'mamofahi koko pana'amale'ita Sipi Bouba lilina ka lu le'eto'ehina'a huto ka lu leptito nohu'igo ai kumu agoya hu emi'ahanamo ni'ibe. Hu'mau le'emi'ehina lili'na lili'na ni'ibe. <sup>6</sup>Bigaha'a nani'ni lito kofo'ohuna ya'ma suhi huto nani folagahatinigu lili'na hapi fi'ohuna. Apolosiu ai bigaha'alo nagami'i hekito ligilata Hu'mau ya'ma lusa agigo legeya'a holata nohibe. <sup>7</sup>Ya hu'ehina'mu lito kofolata nohina bo ai kumu melilune to nagami'i ligilata nohina bo ai kumu meliluta ni'inaya lusa gigo legeya'a le'mo holata nohina bo Hu'mamofahi ai moneko kumu lilune. <sup>8</sup>Lito kofolata nohuna to nagami'i ligilata nohina le'ali moneko legegeto nohu'ibe. Mina'a ya'ma lili'na li'ohu'ina legegeto eto eto huto lili'ina'mu yabe. <sup>9</sup>Le'ali Hu'mamofahi lili'nalo bo'a nohu'ibe. Hu'mamofahi foya'a lenaliya nehabe.

To mone hiti fono ka luto lenali Hu'mamofahi nohi hepa'a lolo hite nehabe. <sup>10-11</sup>Hu'mau lili'na nimi'ehina'mu luto nani nohi gise'namofahi lamana'a ufe'ye yafa lukesa lito fi'ohuna. To anamofahi gupisalo bona'i luga'amagi molo emite nohi gilata nehabe. Lukesa fugo mino'ehina ya'ma Yesu Kilisito yabe. Ya'ma li sigito mone fato lukesa aku'i filana'a meni'ibe. Yana'mu nohi neginamagi keheli fe lite minete kaba hite gilabe. <sup>12</sup>To lukesa yamofahi gupisalo moneuba goli efahi yatufi, to siliba efatufi, to mina'a tito nina efatufi, to helebole yafatufi, to akepatufi kifinatufi gilina yamofahi minoto nohi gi'ehina ya suhi huto hapa'a huto hilube'mu hibe. <sup>13</sup>Minoto Kilisitohi Sipi Yupahi alina kanagu hapa'a huto hilina'mu yabe. Ya nehinogo logo sipi i kulu tilube'mu hibe. To ana logouba nohi negite lili'na li'ahananamofahi hapa'a li huto hilina'mu yabe. <sup>14</sup>Bo moneuba lukesamofahi gupisalo nohi gi'ehina ana logouba lo su mehalinagi fa'mene minalina yamofahi ai'a mina'a lilina'mu yabe. <sup>15</sup>To bo moneuba nohi gi'ehinanamofahi lili'na logouba lo su ho etalina yamofahi ai mina'a melilina'mu yabe. Ai lili'na lito gi'ehina Kilisitou li fekilito to ana bomo logoguti buto bilina'mu yabe.

<sup>16</sup>Lenali ya'ma Hu'mamofahi sipi mono noha'a nehabe to Hu'mamofahi Sikalafu'uba komopatinigu minoto nohina yamofahi mekeheli'ahafihe? Ya'ma lenali akeheli'ahana. <sup>17</sup>Hu'mamofahi noha'a ya'ma eto huto ni'ibe.

To ai noha'a ya'ma lenali nehanagihe. Luga'amagi enali Hu'mamofifi  
sipi noha'a li sibina hilanamofifi Hu'mau ai'a ana suhi huto ana  
bona'i enele'mo sibina hilina'mu yabe. Ya'ma lenele'mo sibina hilana  
bona'magihii Hu'mau enele'mo sibina hilina ni'ibe.

<sup>18</sup> Lenali komopatinii keheli sibina mehilo. Lenalitogati moneuba  
nani ma melugu bona'magihii kehelise'na'anii bati huto li'ohuna bo  
nohubo luto lilina ya'ma ai kehelise'na'a he'mito bona'magihii enubulo  
kehelise'na batii mehina bo lolo huto minalibe. Henabe lutobe? Ai ya  
hulenogo lusi kehelise'na Hu'mamofitogati lilibo luto yabe. <sup>19</sup> Metoga  
bona'magi kehelise'na'anii yamofifi Hu'mau kehelinogo legeya'a lolo  
mehilina'mu yabe. Ya hu'ehina mono bukugu Hu'mau kumu kaga mone  
ma lite fayahii keye'ahanamo ni'ibe: *Hu'mau ai enali keheli fe lu'ohune  
lite ana'ina neligo kofohi nemele epalago kofohi molo'ehinagu ananamofifi  
bagagu enele'mo buto nohibe.* <sup>20</sup> To fayahii keye'ahana mone hiti ma huto  
ni'ibe: *Sipi Bouba enali keheli fe lite nohuta bo nohune lite nelina bona'magi  
enegekesa kehelilata nehana ka ya'ma fa'menena lolo hulata nohibe luto Sipi  
Bouba keheli'ehibe.* <sup>21</sup> Ya hu'ehina'mu lenali bona'magihii enugufa le'mo  
lite metilo. Ana'ina silaga nasana lenali kumu yabe luto Hu'mau molo  
lepolo'ehinamo ni'inagihe. <sup>22</sup> Nani Poluita to Apolosi to Pita lali ya'ma  
lenali kumu yabe luto kaba he'mi letago nohune. To melugu nasana  
silaga'i to minolatanafi fililatana to yatai ni'ina nasana alii huto hilina  
nasananamofifi silaga'i lenali nasana ni'ibe. <sup>23</sup> To lenali ya'ma Kilisitohi  
bona'a nehabe. To Kilisito ya'ma Hu'mamofifi pana'a nohibe.

### Aposolomagi Kilisitohi mono ka'a li'ahanamofifi hapa'a

**4** <sup>1</sup> Lenali lali kumu kehelinogo Kilisitohi lili'nalo bo'a to Hu'mamofifi  
suguna ka'a kaba huto leli'ali bo lolo nohuta kehelilo. <sup>2</sup> To kaba bo'a  
enali foya'a li'ahanaguti mone titi be ligi'ehina ka henana ni'ibe? Afo'afu  
lina'asigo hite li'ahanamo ni'ibe. <sup>3</sup> To nani'ni ka lilube. Lenali hiti to bona'i  
luga'a hiti lolo hite minete nani hapa'nimofifi kehelinogo lamana'a lolo  
mehilina'mu yabe. To nani'ni hapa'ni beto mehiluna'mu yabe. <sup>4</sup> Nani  
nipa'nigu keta mehuse nohuto foipana'ni ni'lifi meni'ifi mekehelube. To ya  
hu'ehina lenali folagahatinigu lili'na li'ohunogo foipana'ni meni'igo nohube  
luto melilube. Nani hapa'nimofifi Sipi Bo moneko'uba li huto hilube'mu  
hibe. <sup>5</sup> Ya hu'ehina'mu lenali bona'magihii hapa'ani'mu lilata nehana  
amuya memalalo. Sipi Bouba ai'a i behe huto oto suguna'i fenene huto  
ni'ina nasana yamofifi le'mo hutotoga malalube'mu hibe. To bona'magita  
legekesa kehelilata nohutaga hiti ya'ma li huto hu su halube'mu hibe. Ya  
huloto Hu'mau ai'a bona'magihii hapa'ani moneko moneko'isi bu galina  
guna moloto enele'mo hetofa hu epololota liyafa hilube'mu hibe.

<sup>6</sup> Nalalu'nigita lenali lali hapati ya hite bu gelete keheli fe lilabe luto  
kaga nolunamofifi nani to Apolosihi le'aliti'a ka lu moloto nolube.

Monolugu hite melete minalo lite li'ahana ka'a ya'ma be meligise bona'i luga'a enele'mo ho tila luga'a enele'mobe kohobe mehilo. <sup>7</sup>Ki'afu ligo lenugufa le'momo titi nehabe? Lenalitoga ana'ina bai toto ni'ina yamofifi Hu'mau ya nasana melepi'ehifihe? O'e. Hu'mau ana'ina silaga'i lepi su ho'ehinamo ni'inagihe. Lenali henabe lite nekeheligo Hu'mau ana'ina melepi'ehina lolo nohigo laliti li huto nohune nelite lenugufatini le'momo tilata nehabe.

<sup>8</sup>Lenaliya lenalitini'mu ma lite kehelilata nehabe: Lali lusa gigo ana'inati bai toto ni'ibe. Lali asaga'na keheli baga ito nohune lite nelafiye? Lali menohutogo lenali monolugu kibina bo lolo hite nehafihe? Lenali ya hite lebe ligi'ahynamo ni'ifi ya? Nohune lite lilata nehanaya Hu'mamofifi bulo lama'naka kibina bo lolo hilana ni'inaya, ya hite minete lali'i lele'mete binogo lenalitoga mino moloto ligihiti bogo ana huto lolo huto minaluta ni'itita bati hitine. <sup>9</sup>Nani nekesa kehelito ma luto lu nolepube. Hu'mau aposolo hiti lali fa'mene bona'magihi komopa'anigu lele'momo limito molo leto'ehina'a lolo nohibe. Ya hulago lahalana bo nohuta suhi lolo nohibe. Asagatoga agelo bona'i nehana to metoga bona'i nehana enali gili gili hite lali'i lubugo sibina hilago nohune. <sup>10</sup>Lali ya'ma Kilisito kumu yabe luto negi bona'i lolo huto nohutaya, lenali ya'ma Kilisitotoga nokeheluta nasanati bai toto ni'ibe lite kehelilata nehabe. Lali amuya hiti menohutaya lenali amuya hiti bo likibina bo tegi hite lolo nehana. Ya lite nekehelihihe? Bona'magi lama'naka luto lali'i ya'ma lele'mobe hokobe hilata nehanaya to fato bona'magi lenali lenugufa le'momo tilata nehabe. <sup>11</sup>Yatai huto nohina kana'alo lali ya'ma nose'nati'mu yafi nagami kumu kau'na nolahago filito nominone. Guketeti meninana nohune. To osahi lehelata nehabe. Nohati meni'igo bula ola huto fa'mene nominone. <sup>12</sup>Lugufamofifi nasana huto hilibe luto laliti layahatitu amuya foya lito li huto hulata nohune. Lali kumu lele'mobe hokobe hi'ahana bebe sose ka lu epololata nohune. Kalana'i nemele letago lipakafa menohose fa'mene nominone. <sup>13</sup>Yatai huto nohina kana'alo lele'mo sibina nehanaya fa'mene enele'mo fulu hulata nohune. Lali fa'menena lolo huto bona'i asagatoga sosopana legi huto minolata nohune. Ya'ma lali minomo buto yatai hiti ya huto nohune.

<sup>14</sup>Nani lenubuya hilibe luto ya'ma kaga fayahi menokoyobe. Nani komopa'ni nolepuna pa'ni pana'ni lengekesa li hokolo huto fayahi ya'ma nokoyobe. <sup>15</sup>Kilisitohi kamu'i babafi lilana bona'i ya'ma babu lite nehanaya afotinigi asaga'i menehabe. Yesu Kilisitohi hetofa ka kohe toto lu lepito aitoga lenele'mo bu'ohunagi afotinifita nani'nisigo lolo huto nohube. Ya'mu lenali pa'ni pana'ni yabe luto lu'ohuna. <sup>16</sup>Ya hu'ehina ya'ma nani nigliyakagu ite nemege talabe luto lengekesa lito nolugi keheliloo. <sup>17</sup>Nani ya hilabe luto Timotih ho lufugo lenalitoga foiya nobibe. Ai'i komopa'ni emi'ohuna bo Sipi Bomofifi mono kagu pana'ni lolo huto

minoto ana'ina le'mo fu luto lolo hulata nohina bo ai buto nani Yesu Kilisitohi mono ka'amofifi kapo'a Kilisitohi naga'a noto noto nehana enelepito minolata nohunamofifi buto aku'i lu lepinogo kehelilabe.

<sup>18</sup> Lenalitogati luga'amagi nani kumu ya'ma mealina'mu yabe lite lenugufa limo titi hite kegeiyo fa'mene minelata nehanaya. <sup>19</sup> Sipi Bouba lu kehelinogo bati hinogomo nani lenalitoga nobuto kegeiyo hite neminana bona'magihi kagi'ani keheliloto Hu'mamofitoga amuya mele'ahanamo ni'ilifi yamofifi hapa'a li huto hilube. <sup>20</sup> Hu'mamofifi mono kamofifi kapo'a fa'mene kagagu meni'ibe. Hu'mamofifi amuya'agu yamofifi huto hulata nohibe. <sup>21</sup> To lenali nani kumu henabe lite lilata nehabe? Kipakafa'a hiti obo lite nelafihe to komopaka bati hinogo fulu huto obo lite nelabe? Lenoloka ya nohobe.

### Moko lise nasana'mu huto huto ni'ibe

**5** <sup>1</sup>Lenali kumu ma lite lama'naka lago nani keheluna: Lenalitoga moko lise'na fato'i Hu'mamofifi mekeheli'ahana bona'magitoga ya'ma sipi foipana huto mehuse'namofifi yana hiti huto huto ni'ibe. Lenalitoga bo moneuba afo'afifi liha'a ni'ibe nelago nokehelube. Yana'mu ya'ma nolube. <sup>2</sup> To lenali henabe lite ana'ina ya'ma huto huto ni'ina yamofi kumu lenubuya nehinogo lenugufa'mu menekehelibe. Henabe lite lenugufa le'momo tilata nehabe? Lenali bati hite keke'i nelite lenubuya hulata nohina nasana lilata nohina bomofifi ya'ma folagahatiniguti li he'mi etalana ni'ibe. <sup>3</sup> Nani nugufatu foto'i nohuto komopa'niguti yamofifi lenubuya hulata nohina nasana lolo hina bo ai'i kaga ya'ma folagahatinigu nohuto hu tegi huto Sipi Boti Yesuhi gi'alo ka loko hu su hoto ma luto lu nolepube. <sup>4</sup> Lenali Sipi Bo Yesuhi ai bulo ai amuyalo li gehesa hite nehinogo nani molo kehelito komopa'nitu keheli lepinogo <sup>5</sup> ana mokolo bomofi folagahatiniguti he'mi etelete Satahi yanugu malalabe luto nolu lepolobe. Hena'mube? Ya'ma gufa'auba foipa nohina hapa'a Satau le'mo sibi hulenogo to komopa'a li gelehe higo Hu'mau ana bo buto bulenogomo Sipi Bo Yesu Kilisito nehetilina kanagu meha'a minalibe luto yabe.

<sup>6</sup> Ana'ina keta'a hiti lite minete lenugufa limo titi nehana yamofifi keheli sibina hulata nohubo. Lenali beleti nose'na lolo nehana hapa'a nekeheliyi? Beleti nose'nagu mone yisiti kitili ketele'nauba i tili huto bula ola huto ye ye bilina'mu yabe. Ya'ma mokolo bomofifi hapa'a yisiti tegi huto lenali folagahatinigu bula ola huto batih mehibe. <sup>7</sup> Ya hu'ehina'mu yisiti'mu sa sa hite loko hite li he'mi su henogo nebinogo legeya'a laga'a hiti lolo hilo. Lenali ya hilete yisiti nasana meni'ina beleti, Pasa nose'na nalana yupapogu nonotanana hetofa suhi huto minalabe. To hena'mube? Lali lubuto bilatana sipisipi yaga Kilisitohi ya'ma lali foipana'mu yabe luto fili'ehinamo ni'ibe. To ya'mu aiya lali Pasa nose'na

nalata yupapogu holata nohuta sipisipi yaga suhi huto nohibe.<sup>8</sup> Yamofihu Kilisitotoga hepito legelo bito minalune luto beleti nose'nagu yisiti meni'ina yamofihu foipana hiti moko lilata yisiti suhi li he'mi su holoto yisiti nasana'a meni'ilina nasana yamofihu eto'ehina hapa'a lito to ka lamana'a legeya'amofihu nasana yamofihu nohuto legelo bito minalune.

<sup>9</sup>To nani fayah i mone koyapa'i ma luto koyoto lepi'ohunamo ni'ibe: Lenali kegeiyo hilata nehana bona'i humofa'na hiti meminalo luto lu lepolo'ohuna. <sup>10</sup>Ya'mu nani Hu'mamofihu mekehel'i'ahana bona'magi ana'i guminalo'nafi to yogo fe'nohi babu luto lilube lilatanafu to keya ka li gofa huse'nafi lugefa li filata bofi enali kumu melu'ohuna. Enali ya'ma me'i he'miluta yupahi mege'i malalutalo nehana yana'mu enali hiti lali hiti melugu nohutoti nominone. <sup>11</sup>Nani ma luto koyo lepi'ohunamofihu hapa'a ni'ibe: Hu'mamofihu ka nokehelube luto lenalalutinifu moneuba moko foya lito sibina hilifi to gumesilo a'i lolo hilifi nalisalo lugefa nasana lito minalifi to bona'magi enemegeka lilifi to negi nagamitoko humofa'na hilibe, to keya ka i gofa huto humofa'na hilibe, bona'i ya hana'a hiti mino hepito nose'na menalabe luto lu lepolo'ohunamo ni'ibe.

<sup>12-13</sup>Nani fegutoga bona'i nehana enali'i kaga luto lu laga hu epolose'na yamofihu nani foya meni'ibe. To enali fegutoga nehanamagihi foipana'amofihu kaga ya'ma Hu'mau loko huto lilina'mu yabe. Lenalitini folagahatinigu mono ka nekehelina bona'i enali'i foipana'animofihu kaga'amu lilana yamofihu bati hilube'mu hibe. Ya hu'ehina'mu mono bukugu ma lite keye'ahanamo yamofihu kehelite minalo: *Foipa bo ai'i he'mi etenogo folagahatinigu memineno.*

### Mono'ani meni'ina bona'magihi enubulo foipanamofihu ka'a melilo

**6** <sup>1</sup>Lenalitogati moneuba ya'ma lalu'afihu foipana'a lito nohilinauba ai ana kaga'a ya'ma mono bona'magitoga lu huto mehuse mono'ani meni'ina bona'i enalitoga bite ka foya lulata nohina ya nasana'mu lenubuya menohifihe? <sup>2</sup>Lali Hu'mamofihu bona'a nohunogo alih i fegutoga bona'magihi ka'ani loko hiluta'a mekehel'i'ahana ni'ifihe? O'yo, alih i lenali fegutoga bona'magihi kaga'ani loko hilabe. To ya hilana'a ni'igo henabe lite lenali folagahatinigu ni'ina ka nesi'asi ni'ina'a loko menehabe? <sup>3</sup>Lenali nekehelifihe? Lali minoto agelo bona'magihi kaga hiti loko huto lilune'mu hune. Ya hu'ehina ana'ina fa'mene nasana ya'ma huto hulenogomo, keta mehuse huto fa'mene lu laga hilune'mu hune. <sup>4</sup>Yamofihu kaga'a huto nehinogomo lenali hena'mu Hu'mamofihu bona'i nohuta lali nokehelutogo limilata nohina bo enalitoga lelite bilago lu laga hi lepelelata nehabe? <sup>5</sup>Lenali ya'ma kaga kehelinogo lenubuya hilibe luto lu nolepube. Lenalitoga ekesa hokolo hina bo mone menohifihe? To lenalitoga kagatini huto nehinogomo aitoga lelite binogo le'mo fulu lepalalinamoya, lenali ya'ma ya suhi menehana yabe. <sup>6</sup>Lenalitoga

moneuba lalu'afi hiti foipana'atiti huto hulenogomo Hu'mamofihu mekeheli'ahana bona'magitoga lelito bigo lu laga hi ete'ahabe. Bati mehina suhi nehabe. Lenali ka foya huto hulata nohina yanauba mono katini li kele lilata nohibe.

<sup>7</sup>Lenali bona'a mone'amagi foipana hi lepelenogomo henabé lite legese hite fa'mene meneminabe? Lenele'mo sibina hinogo ya bati hitine. To ai foyagu le'mo melenogo ai ka foyagu le'mo melenogo nehite ya bati mehu'ehibe. <sup>8</sup>Lenali ya'ma lenalitini hiti ana nasana li sibina nehago gumina bauka nelata nehabe. Ya nehite lenali kogunatini hiti ana suhi hi epelelata nehabe. <sup>9</sup>Ana'ina foipana lilata nehana bona'magi Hu'mamofihu ai kapo'agu henetilana'a meni'ibe. Yamofihu mone keheli'ahafihe? Lenali komopatinigu keheli sibina mehilo. Moko takolo bona'i to nalisa lugefa bona'i to ibe sili abe sili bo to bo luga'a bomagihii enugufa li sibina nehite ana'magi suhi hite minese bo <sup>10</sup>to gumina taminalo bo to fe'nohi samahi tito lilube lilata nehana bo to bia nagamitoko humofa'na nehana bo, to enemegeka lilata nehana bo, to fakupa ka lite luba hilata nehana bo, ya nehana'amagihii Hu'mamofihu kapogu metilana'mu yabe. <sup>11</sup>To lenali luga'a koyapa'i ya suhi hite mine'ahanamo ninaya yatai foipanatini ahe'mi lepoloto Hu'mamofihu bona'i minalabe luto komopatinini okala huto le'mo babahi higo nehabe. Sipi Boti Yesu Kilisitohi gi'alo yabe luto to Hu'mamofihu Sikalafu'amofihu gi'amu luto lenele'mo bati higo nehabe.

### Hu'mamofihu gi'a lenugufatinitu hofa talo

<sup>12</sup>Lenali asaga hapa'a keya'i meni'igo bati huto hiluta'mu yabe lite lilata nehabe. Ma'naka nelanaya to asaga hapa'a yanauba lenele'mo bati mehilina'mu yabe. To nani ana huto asaga hapa'a bati huto hilune lite nelana ka mege'i malalufiye? O'e. Mone hapauba naga'i nimilenogo bati mehibe. <sup>13</sup>Lenali ya'ma nose'na lipagu nasana ni'ibe to gupatigu ya'ma nose'na'mu ni'ibe lite lilata nehabe. Ma'naka nelanaya minoto Hu'mau ai ana hiti ana hiti he'minogo fa'menena lolo hilube'mu higo su halina'mu yabe. Lugufauba ya'ma moko'mu yabe luto meni'ibe. Sipi Bomofihu nasana ni'ibe. To Sipi Bouba ai'a lugufamofihu afo'afu nohibe. O'yo, lali aku alihii Hu'mamofihu bulo ho tito minonogo ai lugufa'mu ka foya li letalina'mu. To lali lugufatu Sipi Bomofihu gi'a li hofa talune. <sup>14</sup>To Hu'mau Sipi Bo Yesu fili'ehinaguti le'mo ho ti'ehina ana suhi huto amuya'aloti lali'i lugufamo lele'mo ho tilube'mu hibe.

<sup>15</sup>Mega lenugufauba Kilisitohi gufa'amofihu nekisa'a ni'ina yamofihu menekehelihihe? To Kilisitohi gufa'amofihu nekisa'a mone kapolo a'i hiti le'mo moneko'na hilupihe? Ai ya huto meni'ibe. <sup>16</sup>Lenali ya lite menekehelihihe? Bo moneuba mokolo a'i moneto i kelelenogo etali etugufa'atiti le'mo moneko hilet minala'ina yamofihu mono bukugu sayaha kaga mone ma luto ni'inamo ni'ibe: *Etali loemale'ititihi etugufa'atiti*

*moneko lolo hulenogo hepite minala'ibe.* <sup>17</sup>Ya huto ni'inaya luga'amagi enali Sipi Bomofitoga i hepilenogo ai hiti komopa'ani moneko lolo hilube'mu hibe.

<sup>18</sup>Lenali moko takolo nasana mele'isi he'mite bilo. Bona'i moneuba fato foipa nasana lilina ya nasanauba ai'a gufa'alo le'mo sibina mehilibe. To moko tako lilina ya nasanauba ai'a gufa'a komopa'a le'mo sibina hilina'mu yabe. <sup>19</sup>Lenali ya'ma lite mekeheli'ahafihe? Lenugufatini ya'ma Sikalafu'mofihi sipi mono nohi ni'ibe. Hu'mau lenali lenugafamofihi komopa'agu minoto lito hilibe luto molo lepolo'ehina yabe. Lenali ana lenugufamofihi afo'agita menehabe. <sup>20</sup>Hu'mau lenali mina'a fi lepolo'ehinamo ni'igo lenali lenugufamofihi a'i'asigo ni'ibe. Ya hu'ehina'mu lenugufauba Hu'mamofihi gi'a fi hele hu eteno.

### Bo alobomagihu enali ka

**7** <sup>1</sup>Lenali fayah keyete nenimite ma lite noloka he'ahanamofihu lu huto hilugi kehelilo. Bo moneuba liha'a melise minalube luto lilina yamofihu bati huto ni'ibe. <sup>2</sup>To ya hu'ehinaya kaga mone ni'igo kehelilo, moko lise'nauba enim'i mololatana nasana babu luto ni'inago ya nasanauba enemeto enemeto hite, lenali ana'i lilete lihatini hiti minalana yamofihu bati huto ni'ibe. To ana'i enali ana hite bahatinilo bite bahatini hiti minalanamofihu bati huto ni'ibe. <sup>3</sup>To bo kaiya kugufaka mone kegi'amofihu lihaka o'e melu etobo. To ana huto a'maka kugufaka mone kegi'a bahakamofihu o'e melu etobo. <sup>4</sup>A'i, kai kugufakamofihu kaga'a kaitogati meni'ibe. Bahakamofihu nasana ni'ibe. To bomaka kai kugufakamofihu ka'a ya'ma kai'na meni'ibe. Lihakamofihu nasana ni'ibe. <sup>5</sup>Bo albole letali letugufamofihi lite amanapa lolo mehiliyo. Fa'mene Hu'mamofitoga nunumu hite malalu'ibe'mu keta mehuse hite kanatiti kanatiti lu kehelillete kana'a melelete lila'ina yamofihu bati hilube'mu hibe. Malala'ina kana'a su holengomoaku'i li hepite malaliyo. Malala'ina kana'a be liginogomo yamofihu Satau ai enim'i molo hinogo foipa hi lalibe luto nolube.

<sup>6</sup>Bo alobo hite minalabe luto lu memolo lepolobe, fa'mene keheli leptolube. <sup>7</sup>Nani komopa'niuba ma luto nolibe: Nani nohuna suhi hite kofuta minalanamoya. Ya hu'ehina'mu Hu'mamofihu amuya'auba fato fato suhi huto lele'mo huto hu'ehina yamofihu kapo'a fato fato suhi huto ya suhi ma suhi huto ni'ibe.

<sup>8</sup>Yafa'ana'i hiti to neheya kola hiti to keto ana'i hiti enali ka'ani ya'ma ma luto nolube. Enali nani suhi lite bolo mebise ana'i melise mineme bilana yamofihu bati hilube'mu hibe. <sup>9</sup>Ya hilanamoya moko lise lengekesa yamofihu bo alobo topa helatana lengekesa kehelilanamo, yanamofihu logo'auba lenele'mo sibina hu laligi bati hite bo alobo lolo hite minalo.

<sup>10</sup>Bo alobo lenali kaga lilugi kehelilo. Yamofahi nani ka'nisigo meni'ibe. Sipi Bomofahi bagaguti kaga hiti nolube. Lenali ana'magi bahatini mehe'mi epalalo. <sup>11</sup>To bahatini he'mi epelete yamofahi bolo mebise fa'mene minalo. To bahatini hiti aku'i li hepite minalo. To lenali bomagi lenali lihatini mehe'mi epalalo.

<sup>12</sup>Boana'i luga'amagihi kaga lilugi, kehelinogo Sipi Bouba kaga luto keheliloto nolibe lite mekehelilo. Nabaga le'mo babahi higo nolube. Kilisitotoga komopa'a molo emi'ehina bo mone'mofahi liha'uba mono ka mekehelise a'i minalina ai baha'a hiti minalu'ibe luto nelinogo baha'uba ho lifi mehe'milina'mu yabe. <sup>13</sup>To Kilisitotoga komopa'a molo emitto minalina a'i mone'mofahi baha'uba mono ka mekehelise minalina ya'ma liha'a hiti koguna huto minalu'ibe luto nekehelinogo liha'uba mehe'mi etalibe. <sup>14</sup>Yana'mu batu huto minala'ina'mu yabe. Hu'mamofahi ka mekehelise bona'i enalitoga liha'animagihi Hu'mamofahi lusa yauba enalitoga hiti buto nolibe. To mono ka mekehelise ana'i enalitoga ya'ma baha'animagihi lusa yauba enalitoga hiti buto nolibe. Ya nohigo yagapanan'animagi Hu'mamofahi lusa'ani hiti lolo hite neminabe. Enalitoga lusa meminatita yagapanan'ani ya'ma Hu'mamofahi ka'a mekehelise bona'i suhi hite lolo hite minatita'mu yabe. <sup>15</sup>Mono ka mekehel'i'ehilina boubafi to mono ka mekehelilina a'ubafi baha'afi to liha'afi he'mi etoto bilube luto nelinogomo o'e melilo. Hu'mamofahi ka keheli'ehilinauba o'e meluto naga ito li pili kaluta'a meni'ibe. Hu'ma koguna ite hepite minalabe luto elesa molo'ehinamo ni'ibe. <sup>16</sup>Ya ni'ina'mu a'i kai bahaka hiti hepite minala'ina yamofahi Hu'mamofahi kapogu bahaka le'moto alapihe le'moto mealane? Ya'ma keheli'ahapi, ya? To bo kai lihaka hiti epite minala'ina ya'ma lihaka Hu'mamofahi kapogu le'moto alapihe le'moto mealane? Ya'ma keheli'ahapi, ya? Ya'mu lenali mele'isi mehe'miliyo luto nolube.

### Hu'ma suhi hite minalabe luto lu leto'ehina ana suhi huto minalune

<sup>17</sup>Lenali lenemeto lenemeto hite Sipi Bomofahi suhi lolo hite minete lite hilabe luto lu lepolo'ehina to Hu'mau elesa molo emina yupahi lolo huto moloto minolata nohina yanamofahi mono kagagu minalo. Nani noto noto Yesuhi naga'amagihi ya'ma kaga lu epito lu laga hulata nohube. <sup>18</sup>Bona'i luga'amagi Hu'mamofahi keya'a enugufa laga hi epele'ahago Sipi Bouba elesa molo epinogo o henetilanamagi ana huto ana keya'i ya'ma Yuta bona'i enali li mehe'milabe. To bona'i luga'amagi enugufalo Hu'mamofahi keya'i meni'ilinamagihi Sipi Bouba elesa molo epinogo o henetilanamagi ana keya'a kumu ya'ma fegutoga bona'i enali buka metilabe. <sup>19</sup>Enugufa laga hite minalana to enugufa laga mehise minalana enali'i nasana fa'menena meni'ibe. Hu'mamofahi bagaguti kaga'a kehelite lite minalana nasana yamofahi lamana'a ni'ibe. <sup>20</sup>Bona'magita lolo hite melete nehago

Hu'mau elesa molo epi'ehina yamofihu komopa'aguko minalo. <sup>21</sup> Kai kele kele pana'i lolo huto nohatogo Hu'mau elesa molo kimi'ehina yana'mu kegekesa loe lae mehinogo ana'asiloko minobo. To kele kele pana'i lolo huto minoto foya lilata nohataguti gulu ho ketalune lite nelinogomo o'e melubo. <sup>22</sup> Kai kele kele yagapan'a'i nohatogo Sipi Bouba elesa molo kimi'ehina'a kai Sipi Bouba foipanaguti pa so ketoto gulu ho keto'ehina bomo nohata kehelibo. To kai ya'ma fa'mene nohatogo Sipi Bouba elesa molo kimi'ehina'a kai Kilisitohi kele kele yagapan'a'lolo huto nohata kehelibo. <sup>23</sup> Yesu ai'a lenali'i mina fi'ehinamo ni'ibe. Ya hu'ehina'mu metoga bona'i hapa'animofihu kele kele'i lolo mehise Kilisitohi kele kele'i hi etete minalo. <sup>24</sup> Nigibo nalalu'nigita. Lenali lenemeto lenemeto hite ya'ma koyapa'i lite melete nehago Hu'mau elesa molo lepi'ehina analoko yatai kana Hu'mamofitoga hepite minalo.

### **Bo meli'ehina'a hiti keto a'i hiti ka'atiti**

<sup>25</sup> To bolo mebi'ahana ana'mu to liha'ani meli'ahana bo'mu ya'ma Sipi Bomofihu bagaguti kaga meli'ohutaya Sipi Bouba komopa'a nimito nele'mo lamana nohina yana'mu ka'ni nifita ilata nohuna bomofita ya'ma nolube.

<sup>26</sup> Yatai kana'a ya'ma keta huse nasanamofihu komopa'agu nohutogo lenali fa'mene minalana bati hilibe. <sup>27</sup> To lihaka nohifi mehe'mi etobo luto kehel'i'ohube. To ana'i melise nohapi ana'mofi kumu sa sa mehubo luto kehel'i'ohube. <sup>28</sup> To a'i lilata yamofihu sibina mehilube'mu hibe. To fa'mene nohilina a'i moneuba baha'alo bilinamofihu sibina mehilina'mu yabe. Anabole neminanamagi nasana'muko keke'lite minalana, ya suhi lenalitoga huto hu lalibe luto negekesa nokeheluto ya'ma nolube.

<sup>29</sup> Nalalu'nigita, kaga ya'ma lu lepiluna kehelilo. Hu'mau molo'ehina kana asu halube'mu hibe. To kana'a hupamone hu'ehinago liha'ani hiti nehana'amagi bati hite liha'ani menina bo tegi hite Hu'mamofihu foya'a amuya melete minalo. <sup>30</sup> To yibi hafili hite neminanamagi minete lite hilanamofihu yibi hafili mehu tegina lolo hinogo minalo. To lenegelo bilata nehana lenali minete lite hilana yauba lenegelo mebi tegina lolo hinogo minalo. To fe'nohi mina fite neminanamagi fe'nohatini memino tegina lolo hinogo minalo. <sup>31</sup> To ma melugumofihu yogo fe'nohi molose'na lite ete hilata nehana yamofihu ya mehuse suhi hinogo minalo. Hena'mube? Me'mofihu ya'ma fayaha'a hiti ni'igo bu goto kehelito nominotaya fenene hilube'mu nohigo ya'ma kaga nolube.

<sup>32</sup> Lenali ya'ma fa'menena'mu yamofihu lengekesa yigiba yigiba hite keta huse'namu minalabe luto kehel'i'ohuto nolube. Bo kofuta nehana'amagi Sipi Bomofihu foya'muko kehelite minalune'mu habe. Minete Sipi Bouba kehelinogo bati hilibe lite lileno'lilune'mu habe. <sup>33</sup> Liha'ani hiti nehanamagi metoga nasana'muko kehelilune'mu habe. Ya

nehinogo liha'animagi kehelinogo bati hilibe litego lilune'mu habe. <sup>34</sup> Ya nehite enegekesa loemo nekehelite neminabe. To ana suko hite yafana'i panala'i enali Sipi Bomofihu lili'namuko kehelite minalune'mu habe. Ya nehite komopa'ani enugufa'ani Sipi Bomofitoga molo emilune linogo kehelilune'mu habe. To baha'a hiti ana'i enali metoga nasana'muko kehelilune'mu habe. Ya hiletē baha'animagi kehelī laga hilabe lite ya hilune'mu habe.

<sup>35</sup> Lenali bati hite minalabe luto kaga ya'ma lu nolepube. Lenali kapo fi hekini nologopa, lenali negi menese komopatini li nupa hite melelenogo Sipi Bomofitoga asagato minete agoya hi emite minalabe luto nolube.

<sup>36</sup> To bo moneuba ai pa'a ya'ma bolo bilina legege hulenogomo ya'ma kaba huto le'mo mololoto nohinogo komopa'agu laga'a besinogo kosele'i henogomo baha'alo ho lifilube'mu nohutomo, ho lifilina ya'ma sibina mehilube'mu hibe. <sup>37</sup> Ya hilinamoya bo moneuba komopa'atu ma luto kehelī amuya malalube'mu hibe: Pa'ni ya'ma fa'mene minalibe luto kehelinogo pa'a minalibe, keta mebesinogomo lu huto huto lu laga hinogo bati hilube'mu hibe. <sup>38</sup> Ya hu'ehina bo moneuba ai pa'a baha'a lilibē luto kehelī emilina ya'ma bati hilube'mu hibe. To moneuba pa'a ho melifise le'mo mololoto minalina yamofihu bati huto mino lito tilube'mu hibe.

<sup>39</sup> A'i moneubafi moneuba baha'auba moloto hilina, hilina'a huto mino lito buto minalinagihe. Baha'a fililenogo ya'ma bo moneto bilube lutomo bilibe. Ya hu'ehinaya sibi saba huto mino lito bilina'a meni'ibe. Sipi Bomofitoga komopa'a emilina bolo bilina'mu yabe. <sup>40</sup> Negekesa keheluna ana a'i bolo mebuse fa'mene minalina ya'ma gelo bito minalube'mu hibe. Ya suhi huto kaga ni'inaya negekesa keheluna Hu'mamofihu Sikalafu'i nanitoga nohigo nolube.

### Faga lugefa nasanamofihu seba'a epilata nehana ka'a

**8** <sup>1</sup> To faga lugefa nasanamofihu seba'a nelata hi'ahana yamofihu keheluto lu lepilube'mu nohubē. Lali asaga bona'magita ana'ina hapa hapa'a akehelilata nohune lite nelafihe? Yamofihu kehelī'ahanaya hapa'a kehelise ago keheliletetini lenugufa le'momo titi nehabe. To komopatini ai eminogo ai eminogo hite to ai he'menogo ai he'menogo hite minalana ya nasanauba lufusatini lolō hu'ehinogo bati hite minalana yabe. <sup>2</sup> Luga'amagi enali kehelise'nati napa huto ni'ibe lilana ya'ma enali kumu lilune. Kehelise'namofihu legeya'a mone'a hiti meli'ahabe luto lilune. <sup>3</sup> Luga'amagi enali komopa'ani Hu'mamofitoga molo hetofa hilana enali ya'ma Hu'mau kehelinogo bati hilune'mu habe.

<sup>4</sup> Ya hu'ehina faga lugefamofihu seba'amu ya'ma luto kehelilata nohune: Faga lugefa ai ya'ma nasana lamana'a meni'ibe. Hu'mau ai moneko lamana'a nohibe. <sup>5</sup> Fato fagalo kene'i silaga'i kokulumagu to melugu nehabe lite lilata nehabe. To foipa lugefanamofihu sipi bona'i to enigihiti

nehana kene'i babu luto nehana keheli'ahanaya. <sup>6</sup>Lali ya'ma Hu'ma afotifu moneko'i nohibe luto keheli'ohutamo ni'inagi aitogati ana'ina silaga'i huto hu su ho'ehina. To laliya ai kumu ni'ibe luto hilune luto nohune. To Sipi Bo moneko'i Yesu Kilisitohi ai yanagu ana'ina silaga'i huto hu'ehina to lali ai yanuguko nohune.

<sup>7</sup>Ya huto ni'inaya bona'i luga'a enali ya'ma hapa'a ya huto ni'ibe lite mone keheliya ilana'a mehabe. To ya hana'amagi enali koyapa'i to yatai hiti lugefamo lusi kene'i nohibe lite kehelilata hi'ahanamagi komopa'ani lapa mebi'ehinagi to enali seba'a nete ana lugefamofihu amuya'amu keheligo ketana lolo nohigo nete komopa'ani le'mo sibina hilata hi'ahanamo ni'ibe. <sup>8</sup>Hu'mau ai nose'na nonotana to menonotana yamofihu kehelinogo sibina lolo mehilube'mu hibe. Seba'a nolata'na yamofihu kehelinogo sibina hilifihe? To menolata'na kehelinogo bati hilibe. Aitoga ya huto meni'ibe.

<sup>9</sup>To bonatinitoga mone ya huto ni'ifi, meni'ifi kehelilo. Fa'mene luga'amagita lenali lengekesa kehelite fa'mene nalune lite nehana'amagita lenalalutinighi mono kagu amuya memele'ahanamagihi enali komopa'ani li sibina hi lalagi, ya'mu kehelinogo keta lepesino. <sup>10</sup>Kai komopaka hokolo hinogo minalata lugefa nasanamofihu nonugu seba'a noto nehitogo, kalalukafu moneuba kehelinogo komopa'a keta huto lapa mebinogo nohilinauba bu kogoloto ya'ma luto lilina'mu yabe: Nonanago nani ana huto nalube luto luloto nalube'mu hibe. <sup>11</sup>Noloto'a ya'ma kalalukafu mono ka'a nesi'a keheli'ehina bouna Kilisitou mina fi'ehinamo ni'inago kai komopakagu buloto foipa huto sibina mehilina ni'ifihe? <sup>12</sup>Lenali ya suhi nehite lenalalutinighi enele'mo mumusopa i epelete komopa'ani enele'mo sibina hilata nehabe. Komopa'ani li sibina hi epalalana ya'ma Kilisitohi le'mo sibina hilana'a suhi huto lolo hilina'mu yabe. <sup>13</sup>Ya hu'ehina'mu nani lugefa nasanamofihu seba'a neneno nalu'nifu ya nasana'mu yabe luto keheli sibina hu lalibe luto ai kumu kehelugo keta hu lalifihe luto lugefanamofihu seba'a mo sito nohuto minomo buto minalube.

### Aposolo bona'magi foya hapi fi'ahanamofihu ka'a

**9** <sup>1</sup>Nani kumu henabe lite nekehelibe? Mone lulata bomofihu koko pana'a nohibe lite nelafihe? Ya menohube. Nani Hu'mamofihu koko pana'a nohube. Nani kumu ya'ma aposolo bo menohibe lite nelafihe? Nani lusi aposolo bo nohube. Nani ya'ma Sipi Bo Yesu bu mego'ohufihe? Bu go'ohube. Foya'nimofihu legeya'a Sipi Bomofihu nehe'mose'nagu huto hulata nohina yamofihu lenali ya'ma ya suhi menehafihe? Nehabe. <sup>2</sup>To bona'i luga'amagi kumu aposolo lolo mehibe linogo lenali nani kumu aposolo bo nohibe lite nekehelibe. Aposolo foya'nimofihu legeya'a Sipi Bomofihu lusalo huto hu'ehina'amofihu lenali ya'ma nehabe.

<sup>3</sup>Hapa'nimu lilata nehana enali kaga ya'ma lu gelehe ito lu epilata nohubue. <sup>4</sup>Luga'amagi enali lalitogati nani foya'ni li'ohunalozi nose'na yafi nagami'i menalibe lite lu laga hi netalafih? Bati mehilibe. <sup>5</sup>Aposolo luga'a enali to Sipi Bomofihu gonamu tamu'a hiti to Pita enali ana'i yagapanan'ani hiti mono foyalo bilata nehago nose'na epilata nehabe. To lali ana suko huto lihati hiti mono foya lilutamoya nose'natu menimilana yamofihu bati hilifihe? Bati mehilibe. <sup>6</sup>To nani hiti Banabasi hiti le'alisi go le'eyatu foya lilata nohutot'i a nose'natu a lilata nohu'ibe. Enali suhi huto le'ayatu lili'na melise naluta lu laga hu le'ete'ahana yamofihu bati huto ni'iifiye? Mehu'ehibe. <sup>7</sup>Kibina bo enali luba hilana nasana to nose'na a'ni enali'ani efaha'anitu mina filata nehafi? Menehabe. To moneuba foya lito li huto huto hekele'ehinogo lito menalina ni'iifihe? O'e. To moneuba bulumaka yaga kaba huto amiha'ani menalifihe? Nalibe. Ya'mu lenali nose'na le'emilo, luto nolube.

<sup>8</sup>To kaga luto nolunamofihu ya'ma metoga bona'magihi kaga nolube. Ya hu'ehinaya mono bukugu kaga hiti anagu huto nohibe. <sup>9</sup>Moseu keya ka lu'ehina kaga ma luto lu'ehinamo ni'ibe: *Bulumaka moneuba foya noli epoloto kifi nalube'mu nohinogomo o'le melilo*. To Hu'mau kaga ya'ma lu'ehina bulumaka enali kumuko melu'ehibe. <sup>10</sup>Bona'magita lalimo hiti lu'ehinamo ni'ibe. Foya lilata nehana enali legeya'a huto higo nalune lite keheli'ehite hekelelata nehana ya bati hulata nohibe. <sup>11</sup>To nani Banabasi hiti le'ali ya'ma lenalitoga komopatinimofihu nasana legeya'a hekololata nohu'ina yanamofihu mina'a lenalitogati le'agufamofihu nasana lili'ina'mu keheligo keta nohifihe? <sup>12</sup>Luga'a enali lenalitogati nose'na fe'nohi lilata nehana ya nasanauba bati hu'ehinamo ni'inaya lama'naka le'ali hiti ana suhi huto linogoti bati hilinamoya le'ali hapi huto foya li'ohu'inagati ema meli'ohu'inamo ni'ibe. Kilisitohi ka lamana'amofihu kapo fi hekini lo eto lalu'ifihe luto lenalitogati nose'na fe'nohi lilabe lite li'ahanamo ya'ma he'milotu ketana lito humofa'na hulata nohu'ibe. <sup>13</sup>Sipi mono nonugu foya nelina'amagi enali mono nonugutiko ite neana nose'na luga'a nelata nehabe. To logo'nogo hite kuguhi koyo emilata nehana bona'i logo'nogo hite nose'na laita hite nelata nehabe. Ya nehana'a ya'ma lenali menekehelibe. <sup>14</sup>To ai Sipi Bomofihu ka'a leli'ali bona'i lali ana suhi huto ka lamana'a keheli'ahanaloti lugufamofihu nose'na lilabe luto lu lepolo'ehinamo ni'ibe.

<sup>15</sup>Ya hu'ehinaya nani'ni ya'ma kapogu menobube. To lenali ya'ma ana suhi li netalabe luto keheli'ohuto fayah ya'ma mekoyobe. To bo moneuba ya'ma nani suhi huto Hu'mamofihu ka lu nolepito mina'a melise negelo bilata nohuna li sibina hu lalibe luto yamofi kumu kehelugo keta nohinago fililata nasanauba nanitoga lilifihe? luto yana'mu kehelugo keta mehuse nohibe. <sup>16</sup>Ka lamana'a lu huto hulata nohubue. Yana'mu lusi bo nohubue luto liluna yamofihu bati mehilina'mu yabe. Lili'na'amofihu nani

nugupisalo molo'ehinamo ni'ibe. Ka lamana'a lu yege mehotita akae, bati mehina suhi huto minotita'mu yabe. <sup>17</sup>Foya ya'ma nani'ni negekesa kehelito li huto huto lutita yamofifi minomo buto mina'a lutita'mu yabe. Nani'ni negekesa kehelito meli'ohunamo ni'inago yamofi kumu ma luto ni'ibe. Hu'mau ana foya nugupilo molo netago lilata nohubes. <sup>18</sup>Ya hu'ehina'mu mina'a lilata nohunamofifi ma luto ni'ibe. Nani mono foyalo nobuto ka lamana'a mina'ani meni'ina bona'i lu epilata nohubes. Ya nohuto ka lamana'a lulatanamofifi mina'a lugufamofifi nose'na'a lilatana'mu li'ahana ya'ma he'milata nohubes. Nani negelo bise'namofifi ya'ma mina'a nolube.

<sup>19</sup>Nani asaga bona'magihi kele kele bo'ani menohube. Aku'i bona'i yege yege'i ya'ma Kilisitotoga enele'mo malalube luto fa'mene kele kele'ani lolo huto nohubes. <sup>20</sup>Yuta bona'i Kilisitotoga enele'mo malalube luto Yuta bo enalitoga minoto, Yuta bona'magihi suhi lolo hu'ohuna. To nani'nimu Moseu keya ka lu'ehina kagamofifi kele kele'i hu etoto ni'igopa keya kalo kele kele'i hi etelata nehana bona'i ya'ma Kilisitotoga enele'mo malalube luto enalitoga mino moloto keya ka lu'ehina kamofifi kele kele pana'a suhi lolo hu'ohuna. <sup>21</sup>To fegutoga bona'i enali Moseu keya ka lu'ehina ka mekeheli'ahana bona'i Kilisitotoga enele'mo malalube luto fegutoga bona'magi enalitoga mino moloto keya ka mekeheli'e bo suhi huto lolo huto mino'ohuna. Ya'ma Hu'mamofifi bulo ya'ma ai'a lu'ehina ka'a mege'i mege'i memalalube luto melilube, nani'ni Kilisitou lu'ehina ka'a mege'i moloto keheliya i'ohube. <sup>22</sup>To bona'i mone'a komopa'anigu Hu'mamofifi kagagu amuya'ani menina Kilisitotoga enele'mo malalube luto nani amuya'ni menina bo suhi huto lolo huto mino'ohuna. Nani ya huto fato fato bona'i enehe'malube luto bona'i fato fato bona'i enalitoga minoto fato fato suhi lolo hu'ohunamo ni'ibe.

<sup>23</sup>Silaga nasana yamofifi fa'mene ka lamana'a huto holito bilibe luto lolo hulata hu'ohube. To Hu'mau lusa nogi epoloto nani hiti lusa gi metalibe luto lulata nohubes. <sup>24</sup>Lenali ma lite menekeheliye? Yokolo'na lolata hepato ya'ma yagapana'magi enali yege yege'i hololu lilata nehana nasana ya'ma moneko'uba kohe toto hololu luba luba huto henetito mina'a lilata nohibe. Lenali ana hite Hu'mamofitoga bite sekele mamuti lilune lite hololu lilo. <sup>25</sup>Yagapana'i yokolo'na hilana enali enugufa amuya malalune lite hapi fite fato legege hite elata nehabe. Lilune'mu nehite enali sekele mamu nasana fa'menena'mu ya suhi hilata hi'ahana yabe, lali ya'ma sekele mamu'a minoba minoba nasana'mu ya suhi hilune. <sup>26</sup>Nani'ni hiti ya'ma hololu lulata nohuna yamofifi keya'a hiti nasana bu go'ohuto fotogo huto hololu lulata nohubes. Nani foya li'ohunamofifi nani ho fetaga mehube. <sup>27</sup>Nani bona'magihi mono ka lu epi epi huto nohuto nani'ni fa'menena lolo hu lalube luto nugufa'ni lelito limito moloto kaba'a hu etoto nominobe.

## Faga lugefamofahi lipite agoya mehi etalo

**10** <sup>1</sup>Nalalu'nigita lali tatatigi lolo hite melete hi'ahana yana'mu kehelilabe luto lenelepilugi kehelilo. Moseu Iyipi metogati enele'moto nobigo enali yege yege bona'i sopohuba ifi to epalago bi'ahana enali asaga'i hege nagami'i lite bi'ahana. Ana nagami'mofahi gi'a Safa Nagami'i yabe. <sup>2</sup>Ya nehite Mosehi mege'i malalababe luto sopohuba to hege nagami'uba asaga'i mono nagami'i lolo higo fele'ahana. <sup>3</sup>To enali ka melugu nebago Sikalafu'uba kokulumaguti nose'na li huto hu epigo asaga bona'i nete mine'ahana. <sup>4</sup>To Sikalafu'uba efanuguti nagami'i li huto hu epigo asaga bona'i ne'ahana. To ana efahi Hu'mamofahi Sikalafu'uba li huto higo yauba enemege'i moloto bu'ehina. Ana efahi yamofahi Kilisito yabe luto yatai lali nokehelune. <sup>5</sup>Ya hu'ehinaya Hu'mau ana Isilaeli bona'i luga'a enali kumu foke ka meli epalago kame metoga fili su he'ahago sekuya'ani i tili tele hu'ehina.

<sup>6</sup>To Yuta bona'i tatatimagi enalitoga nasana huto hu'ehinamofifi lali legekesa li hokolo huto huto hu'ehinamo ni'ibe. Lali ya'ma foipa nasana'mu lipoti melenogo ana suhi lolo hu lalutigi. <sup>7</sup>Enalitogati luga'amagi faga lugefa nasana'mu lipi emite agoya hi emite mine'ahana. Lenali ya'ma ya suhi mehilo. Yamofifi mono bukugu ya'ma fayah i ma lite keye'ahanamo ni'ibe: *Bona'i enali meto minete nete nete ete ho tilet faga lugefa nasanamofifi gelo bite melekehi hi'ahana.* <sup>8</sup>Ya hilete moko lise nasana fato fato'mofifi li huto hite mine'ahana ya suhi mehilune. Enalitogati luga'amagi ana nasanamofifi foipana li huto hite minago Hu'mau nona'a epigo ana moneko'isi yupahi moneko bona'i luga'a babu lite fili'ahana'a ya'ma 23,000 fili su he'ahana. <sup>9</sup>To mone yupahi hiti enalitogati luga'amagi Sipi Bo kumu komopa'a batihina bo nohibe lite fitaga hi etago, Hu'mau enoho lifi'ehina osifa'magi henipalago fili su he'ahana. Lali hiti ya huto Sipi Bomofifi fitaga mehu etalune'mu nohune. <sup>10</sup>To mone yupahi hiti enalitogati luga'amagi Hu'mamofifi bugunefigo enoholata bo agelouba enoho'ehina. Lali hiti ya mehilune.

<sup>11</sup> Enalitoga nasana huto hu'ehina yanauba lalitoga sipina lipoti nomalana yamofihu bu galune. Me'i hiti kokulumaga hiti kana'atiti hupamone nohinagu nohune. Kaga ya'ma legekesa lite yamofihu beto hiti fayahie keye'ahanamo ya'ma ni'ibe.

<sup>12</sup> Ya hu'ehina'mu ya'ma moneuba ai'amu kehelito Hu'mamofifi kagu amuya moloto nohilina bouba buto sibina hu laligi, yamofifi legeso huto kaba huto minalibe. <sup>13</sup> Lenalitoga lenimi'i mololata nasanauba huto huto o henetilina ya'ma noto noto bona'i asagatoga ana suko huto hulata nohibe. Ya hu'ehinaya Hu'mau keheligo ule'ale hulata bo nohinago fi betaga hube nohina nasana moneuba huto huloto lenali amuya be ligito enele'mo felu halina'a lolo nehinogomo Hu'mau ai'a lenele'mo bati

huto amuya lepito bihu komogetalo lenelepilenogo bite fa'mene mineba mineba minalana'mu yabe.

<sup>14</sup> Ya hu'ehina ya'ma nalalu'nigita lugefa nasana faga faga lugefa nasanalo meminese hitetini eto hite minalo. <sup>15</sup> Lenali komopatini lenegekesa hiti'namo nehabe. Yamofihi kaga'a ya'ma lilugi lenalitini kehelite bu go fe lilo. <sup>16</sup> Konugu ya'ma bai nagami'l Kilisitou lusa gito molo'ehinamofiji ya'ma nonototi Kilisitohi golaha'a lusa gito molo'ehina ya'ma guna ito lilata nohune. To beleti lusa gito molo'ehina ya'ma nonototi Kilisitohi gufa'a lusa gito molo'ehina ya'ma guna ito lilata nohune. <sup>17</sup> Yupala nose'na ya'ma moneko'i nose'na lali asaga'i nolata nohune. Ana suhi luto lali asaga bona'i i hepito moneko'i lolo hulata nohune.

<sup>18</sup> Lenali ya'ma Isilaeli bona'magi kumu kehelilo. Enali Hu'mamofitoga kuguhi keyete nose'na nelata nehana bona'magi mamufa gilata hitalo Hu'mamofitoga moneko'na hite i hepilata nehabe. <sup>19</sup> Kaga nolunamofiji hapa'a ma huto ni'ibe. Lugefa nasanamofiji seba'a nelata nehana nasana fa'menena ni'ibe. To lugefa nasana ai hiti fa'menena ni'ibe.

<sup>20</sup> Hu'mamofiji mekeheli'ahana bona'magi enali seba'a nelata nehana ya'ma Hu'mamofi kumu meni'ibe. Sibi felemagihi seba'a nelata nehab. Ya hu'ehina'mu nani'ni ya'ma lenali hiti sibi fele hiti i hephilana bat mehibe luto keheli'ohube. <sup>21</sup> Sipi Bomofiji konuguti nelete to sibi kene'magihi konuguti nelete hilana ya'ma kohi loeguti nolata'a meni'ibe. To Sipi Bomofiji hitaloti nelete sibi felemagihi hitaloti nalana'a meni'ibe. <sup>22</sup> Lali foipa felemagihi seba'a nonogomo Sipi Bomofiji ita bi laligi lali enohoka mehilune. Lali amuyatiuba ai'a ya'ma be melig'ehibe.

<sup>23</sup> Lenali ya'ma nasanalo asaga'i lilutamo ni'ibe lite lilata nehanaya silaga nasana lilenogoti ya nasanauba lele'mo bat mehilube'mu hibe. Ana'ina silaga'i liluta'a ni'ibe lilata nehanaya ya'ma nasana silaga'i lelito nobuto mono ka le'mo hetofa hiluta'a meni'ibe. <sup>24</sup> Yamofi kumu nani ma nolube, bo moneuba ai ai'na'ago yana'mu kaba huto mekehelise lalu'afi kumu hiti kehelino. Lenalalutinigihi enehe'mete hetofana hu epalao.

<sup>25</sup> Lenali ya'ma maketigati yaga nose'na mina fito nalune lite lilete mina fite nalo. Ya nehitte faga faga lugefa nasanamofiji nonuguti ni'ifiye lite kehelinogo komopatini keta hinogo lebesi lalibe lite enoloka mehet fa'mene nalo. <sup>26</sup> Yamofihi mono bukugu fayah ma lite keye'ahanamo ni'ibe: *Metoga nasana silaga'i ni'ina yamofiji afo'afu Sipi Bo ai'a nohinagi lali asaga nose'na batu huto nalune'mu nohune.*

<sup>27</sup> To Hu'mamofiji kaga mekehelilata bo moneuba nose'namu elesa molo lepi'ehinogo ya'ma noha'agu tilune litemo tilanagihe. Tinogo nose'na lenubulo molo lepilenogo ya'ma lenegekesa kehelinogo komopatini keta mehinogo fa'mene nalabe. Fa'mene nelete felemagihi seba'a ni'ifihe lite loka mehe etalo. <sup>28</sup> Fa'mene nenenogo bo moneuba

ya'ma yaga ya'ma lugefa nasanamofihu seba'a ni'ibe luto lu hokolo huto lu nelepinogomo ana bomofi kumu kehelinogo keta nehinogomo he'mite mo silo.<sup>29</sup> Lenalitini komopatini sibina hilina'a meni'ibe. Lenalalutinighi komopa'ani sibina hu lalibe luto nolube. To nani komopa'ni keta menohigo henabe luto ai komopa'a keta nohinaguti kehelito'ni mo silune lite nelafiye?<sup>30</sup> To nani Hu'mamofihu fokehi holoto nose'na nalunamo ni'inaya, Hu'mamofihu fokehi holoto naluna nasana'mu moneuba nehabe luto keheli sibina nohibe lite nelafiye?

<sup>31</sup> Nani lenali kalo nona'a ma luto nolube. Lenali nose'na nalune'mu nehitemo to yafi nagami'i nalune'mu to silaga'na hilune'mu Hu'mamofihu gi'a huto huto hilibe lite ya suhi lolo hilabe.<sup>32</sup> Lenali Yuta bona'i nehana to fegutoga bona'a nehana to Hu'mamofihu bona'a naga'i enali enubulo keheli sibina hi'ehilana nasana yamofihu li huto mehilo.<sup>33</sup> Nani ana suhi huto bona'i fato fato enali bu negenogo bati hilibe luto nohuto'ni nani'ni nasana'ni bati hilibe luto meni'ibe. Asaga bona'magi Hu'mau enubuto bise'na'a lilabe luto foya'a lito nominobe.

**11** <sup>1</sup> Nani Kilisitou ito bu'ehina giyakagu ito mege'i mololata nohubue. Lenali ana suhi hite nani nigiyakagu ite nemege'i malalo.

### Ana'magi kakili'ani bilanamofihu ka'a

<sup>2</sup> Lenali yamofihu lolo huto moloto hu'ohunamo ka keheli su he'ehite nani lu yege ho'ohuna kaga kehelilete yamofihu ka'a mege'i melete neminabe. Yamofi kumu nokehelugo laga'ni nebesilata nohibe.<sup>3</sup> To kaga mone linogo'ni kehelilabe, kehelilo. Bo ya'ma ana'magihi afo'anigita nehaba, to Kilisito ya'ma bomagita afotinifu nohinagi to Hu'ma ya'ma Kilisitohi afo'afu nohibe.<sup>4</sup> Bo moneuba ai lataha'alo kakili'i bi'ohuto Hu'mamofitoga ka lilinafi to Hu'mamofihu ka lu huto huto hilinafi ai Kilisitohi le'mo laba hilina nasana lolo hilube'mu hibe.<sup>5</sup> To a'i moneuba kakili'i mebise Hu'mamofitoga ka lilinafi to Hu'mamofihu mono ka lu huto hilinafi ya'ma baha'amofihu le'mo laba hilina nasana lolo hilube'mu hibe. Ya hilinamofihu ya'ma ana'i luga'amagihi oka'ani laga hi su hete neminana ana'magihi tegi lolo hilube'mu hibe.<sup>6</sup> Ya hu'ehina'mu a'i moneuba mono nonugu tito lataha'alo ana'ina ifi toloto ya mehu'ehinogomo ya'ma lataha'alo oka'a laga hi su hete le'mo hupamone hi etalo. To a'i moneuba oka'ni he'mi netenogo nubuya'ni hilibe lilina a'uba kakili'i li biloto mineno.<sup>7</sup> To bomagi mono ka lilana kanalo lataha'anilo ana'ina lite ifi telete minalana bati mehilina'mu yabe. Hena'mube? Enali ya'ma Hu'mamofihu nasana hiti to Hu'mamofihu sekele mamu'a lolo hi'ahabe. To ana'i enali ya'ma bomagiji sekele mamu'a nehaba.<sup>8</sup> Hu'mau ai bo ya'ma a'mofitogati lito lolo mehu'ehinagi a'i ya'ma bomofitogati lito lolo hu'ehina yabe.<sup>9</sup> To Hu'mau bomo ya'ma lihakamofihu kumu yabe luto le'mo huto mehu'ehibe. A'i ya'ma

bomofi kumu yabe luto le'mo huto hu'ehina yabe. Ya'ma ana'i enali ya'ma bomofihu sekele mamu'a nehabe. <sup>10</sup> Yamofihu mono ka'a lite nehago agelo bona'magi bu gete neminabe. Ana'i enali bomagihu kaba hise'na'animofihu keya'a mone ya'ma lataha'anilo kakili'i lite ifi telete minalana yamofihu bati hilube'mu hibe. <sup>11</sup> Ya huto ni'inaya bona'i ya'ma ana'magihu kaba nehanaya to ana'i ya'ma bomagihu kaba nehana yamofihu Sipi Bomofihu bulo ya'ma boana'i fato fato'mofihu minalana yamofihu laga mehilina'mu yabe. <sup>12</sup> Yata'a ana'i ya'ma bomofitogati lito lolo hu'ehinamo ni'ibe to yatai kana bomagi ana'magitogati huto huto bona'i i futili huto nominone. To bona'i hiti ana'i hiti silaga'i yamofihu Hu'mamofitogati huto hu'ehina nasana ni'ibe.

<sup>13</sup> Lenalitini kehelite bu go bati hilo. A'i moneuba lataha'alo ana'ina bona'i li gehesa hilanaga ifi metose Hu'mamofitoga loka halina yamofihu bati hilina ni'ifihe? <sup>14</sup> To bo moneuba oka'a yatamalo ni'inogo minalinauba yamofihu hapa komopatitu kehelinogo bati mehilube'mu hibe. Yamofihu hapa'a koyapa'i mono ka mekehelise minana kanagu akeheli'ahanamo ni'ibe. <sup>15</sup> To ana'magihu lataha'anilo oka yatamalo ana'ina ifi te'ahana sekele mamu'a Hu'mau epi'ehina'a legi huto ni'ibe. Ana'magihu oka'ani yatamalo minana'mu lite ya'ma keheligo fokehi lilata nohibe. <sup>16</sup> Moneuba ya'ma kaga keheli he'milube'mu nohuto ma luto kehelino. Fato suhi yamofihu lali hiti Hu'mamofihu naga'a luga'a hiti mone lito menohune.

### **Yupala nose'nalo li nupa hise'na**

<sup>17</sup> Ana'ina mone kumu keheli sibina hulata nohuna yamofi kumu lenofokehi meluse lengekesa lito lu lepilugi kehelilo. Lenali mono kalo li nupa hilete komopatini li mehepise loko hilata nehit mono kauba lenele'mo bati mehilibe. <sup>18</sup> To mono kagu li nupa nehago lenali komopatini loko hulata nohibe lite lu nimigo lama'na ka nelafihe luto mone kegi'a kehelube. <sup>19</sup> To loko hi'ahanauba hiya bona'magi Hu'mamofihu bulo mono ka'mu amuya melelata nehana le'mo huto hulata nohibe? <sup>20</sup> To lenali Sipi Bomofihu yupala nose'na nalune'mu li nupa hite minete nose'na nelata nehana ya'ma Sipi Bomofihu nose'na meni'ibe. <sup>21</sup> Lenali nose'na lelitete no bati mehise lenalitini mele'isi eto eto hite nelago bona'i luga'a kau'namu filite minelata nehabe. To bona'i luga'amagi bai nagamiko nete nete komopa'ani enegekesa sibi saba hulata nohibe. <sup>22</sup> Lenali nohatini meni'igo ya suhi lolo hilata nehafihе? Lenali nose'na nalune litemo nohatiniluga minete nalo. Lenali Hu'mamofihu bona'a enali kumu keheligo enumuhi meni'ina bona'i enali keheli sibina enubuya hina suhi lolo hilata nehabe. Ya nehana nasana'mu henabe luto lu lepilube. Lenofokehi lilufihe? O'e lenofokehi melilube.

<sup>23</sup> Lenofokehi melilube luto henabe nolube? Koyapa'i lu lepi'ohunagi Sipi Bo Yesuhi ya'ma mi'mi hu'ehina sinipogu <sup>24</sup> beleti nose'na liloto

Hu'mamofifi foke ka luto gofa hoto noepito lu'ehina: Ya'ma nani nugufa'ni lenali kumu luto nolepube. Nani kumu keheli nimite ya hite nete minalo. <sup>25</sup>To nose'na nelago bai nagami kohi ana suhi huto lito ma luto lu'ehina: Ya'ma konugu Hu'mamofifi mu tifise'namofifi ka'a kosaba'namofifi golaha'ni malalunamo ni'ibe. Nalana'amu nalana'amu ya'ma nani kumu keheli nimite ya hite nete minalo. <sup>26</sup>Asaga yupahi lenali ya'ma beleti nose'na hiti bai nagami'i hiti nalana'amu nalana'amu Sipi Bo molo'ehinagi ai fili'ehina ka'a lu huto huto hite mine lite bite nehinogo ai i behe huto limilina'mu yabe.

<sup>27</sup>Yamofifi bona'i luga'amagi enali Sipi Bomofifi beleti nose'na hiti bai nagami'i hiti li sibi sibi hite nalana ya'ma Sipi Bomofifi gufa'a hiti golaha'a hiti li sibi hinogo foipana huto hilina'mu yabe. <sup>28</sup>Yamofifi beleti nose'na hiti bai nagami'i hiti nalune'mu nehitemo kohe tete komopatinigu kaga ni'ilina sa sa hilete nalo. <sup>29</sup>To bo moneuba Sipi Bomofifi gufa'amofifi hapa'a keheli fe meluse fa'mene nalina yamofifi foipana huto hilube'mu higo Hu'mau nona'a guna malalibe. <sup>30</sup>Ya hu'ehina'mu lenalitogati luga'amagi yupala nose'namu keheli fe meluse fa'mene nelenogo kana'amu kana'amu amuya'ani meni'ina to epesise'na huto hulata nohibe. To luga'a fililata nehabe. <sup>31</sup>Lali hapati'mu sa sa huto lu huto huloto minutita ya suhi huto Sipi Bouba yanamofifi nona'a melimitita'mu yabe. <sup>32</sup>Ino bano minaluta yamofifi Sipi Bouba lali hapati li huto huto osahi limilube'mu hibe. Lenali mono ka mekehelise bona'i hiti mino sibi hite nehite sibina hi lalabe luto ya suhi hu letolata nohibe.

<sup>33</sup>Ya'mu nalalu'nigita, lenali yupala nose'na nalune lite nehitemo li nupa hite minete bona'i luga'amagi kumu enegeba hite nehinogo o neheti su helenogo hapi fite nalo. <sup>34</sup>Moneuba ai nose'namu kau'na sipi henogomo noha'aluga minoto kohe toto neno. Li gehesa hite li sibi sibi hi'ehinogo lenalitoga foipana huto hu laligi. To kaga luga'a nani'ni nobuto le'mo fe lilube.

### Sikalafu'uba mono kamofifi amuya'a limilata nohibe

**12** <sup>1</sup>Nalalu'nigita, Sikalafu'uba amuya fato fato'mofifi limilata nohina hapa'a keheli sibi hise kumu lu lepilugi kehelilo. <sup>2</sup>Lenali koyapa'i mono ka mekehelise bona'i nehago lenegekesa fi hekini lago negi nete nasana luga'amofifi faga faga lugefagu bite i hepilata hi'ahanamo yamofifi keheli'ahanamo ni'inagihe. <sup>3</sup>Yanamofifi megesa'aga linogo'ni kehelilagi keheli'ehilo. Bo mone'mofifi Hu'mamofifi Sikalafu'uba le'mo babahi higo Yesuhi le'mo gumi'i molo emitio melilube'mu hibe. To Sikalafu'uba babahi mehinogo Yesu ya'ma Sipi Bo'ni nohibe luto melilina'mu yabe.

<sup>4</sup>To mono kamofifi amuya'a fato fato'mofifi ni'inaya Sikalafu' moneko'uba ana amuya'a limilata nohibe. <sup>5</sup>Mono kamofifi foya'a fato

fato suhi huto ni'inaya foyamofiji af'o'afu Sipi Bo ai moneko'i nohibe.  
 6 To mono'mofiji amuya fato fato'mofiji foya'a lilata nohutaya Hu'mau  
 moneko'uba lehe'mago lilata nohune. 7 Sikalafu'i yauba monolugu bat  
 hite minalabe luto mono'mofiji amuya'a silaga'i guna moloto limi su  
 holata nohibe. 8 Mone'mofiji ya'ma Sikalafu'uba le'mo babahi higo mono  
 ka keheliya ito lulata nohibe. Moneuba ana huto Sikalafu'ubago le'mo  
 babahi higo fato fapa'a lu bati huto lulata nohibe. 9 To bo moneuba  
 ai ana Sikalafu'moubago le'mo babahi higo Hu'ma kumu keheli ule'ale  
 hinalo amuya nasana huto hulata nohibe. Moneuba ana Sikalafu'uba  
 le'mo babahi higo epesi'ehilina bona'i enele'mo ye kolata nohibe. 10 To  
 moneuba topa hose nasanamofiji foya lilibe luto amuya nohibe. Moneuba  
 Hu'mamofiji bagaguti ka'a lilibe luto komopa'a ekesa li hokolo hu etolata  
 nohibe. Moneuba ya'ma ana'ina silaga'i Hu'mamofiji Sikalafu'mofitoga  
 ni'ina meni'ina nasanamofiji hapa'a bu go bebe salibe luto komopa'a  
 ekesa li hokolo hu etolata nohibe. To moneuba fato ka bona'magihi  
 enonogo'aniguti mono ka sibigopa lilibe luto baga le'mo babahi hulata  
 nohibe. Moneuba enali enonogoguti lu hokolo huto lu epilibe luto baga  
 le'mo babahi hulata nohibe. 11 Ya nasanamofiji amuya silaga'i Sikalafu'i  
 moneko'uba ai'a ekesa kehelito le'mo eto eto huto guna moloto limi su  
 holata nohinamo ni'ibe.

### **Lugufa'a moneko nehepinogo kele kele nasana moneko'i minalibe**

12 Bona'magita lali Kilisitohi lugufa moneko'na tegi huto nohune. To  
 lugufamofiji kele kele nehi etana nasana ligi layahati lokaba labaga lubu  
 legekesa yamofiji babu luto ni'ibe. Enali ya'ma nekisa'a li nupa hago  
 lugufa moneko lolo huto ni'ibe. Kilisitohi gufa'a ana suhi huto ni'ibe.  
 13 Sikalafu'i moneko'uba lalitoga limiloto mono kagu lele'mo nupa higo  
 lugufamofiji suhi huto moneko'i lolo huto nohune. Sikalafu'i moneko'uba  
 lali'i asaga'i mono'i folo leto'ehina lugufamofiji suhi huto moneko lolo  
 huto minalune luto lele'mo nupa hu'ehibe. Ya higo lali Yuta bona'i to  
 Giliki bona'i, kele kele bona'i to fa'mene nohuta bona'i lali moneko  
 Hu'mamofiji Sikalafu'i lito komopatigu molo su holoto moneko'i lolo  
 nohune.

14 Lugufamofiji kele kele'na ya'ma moneko'i meni'ibe. Babu lite nehabe.  
 15 Yamofiji ligigusauba ma luto melilube'mu hibe: Nani yaha'a menohube.  
 Ya hu'ehina'mu gufamofiji nekisa'a menohube luto luloto lugufa he'miloto  
 ai'asigo meminalube'mu hibe. 16 To legekesauba ma luto melilina'mu yabe:  
 Nani bu'a menohunago ya'ma gufamofiji nekisa'a menohube luloto lugufa  
 he'miloto ai'asigo meminalube'mu hibe. 17 Lugufalo ya'ma lubugo minatita  
 lugufa'aub a hena huto ekesa kehelitine? To lugufago ya'ma legekesago  
 minatita lugufa'aub a hena huto tu bitine? 18 Yamofiji ya huto meni'ibe.  
 Hu'mau ya'ma ai'a ekesa keheli fe luto lugufamofiji kele kele'a asaga'i

ya'ma foyaga fato fato'mofiji enele'mo tulu hu'ehina. <sup>19</sup>Lugufamofifi nekisa'a moneko'i minatita lugufa ya'ma sibina huto fa'menena lolo hitine. <sup>20</sup>Yatai ya'ma kele kele nasana babu luto nehago lugufa moneko'i ni'ibe.

<sup>21</sup> Ya hu'ehina'mu lubu'uba layapofifi ma luto lu meemilube'mu hibe: Kai lali lufusati menohatagi he'miloto bubo. To latahatiuba ligigusamofifi ya luto melu etalina'mu yabe: Kai lali lufusati menohatagi he'mito bubo. <sup>22</sup> Ya huto meni'ibe. Lugufamofifi nekisa'a luga'a amuya nasana ya'ma meminatita lali mino bati huto meminotita'mu yabe. <sup>23</sup> To lugufamofifi nekisa'a mone kumu kehelutogo limite nehana'a yamagihi kaba hu epololata nohune. To lugufamofifi buya'a hulata nohina nasana yamofifi guketetu ifi toto sekele mamu hulata nohutaya. <sup>24</sup>Lubuya mehuse nasana ya'ma huto'i minelata nehabe. Hu'mau ya'ma lugufa li huto hu'ehina lugufa nekisa'a limite nehana'a enali'i kaba hu bati hu'ehina. <sup>25</sup>Lugufamofifi nekisa'a enali fato fato hite meminiese legege hite ai kele kele'i hu etenogo ai kele kele'i hu etenogo hite minalabe luto foya epi'ehina. <sup>26</sup> Ya hu'ehina'mu lugufa nekisa'a mone'mofifi kota'i helenogo keke'i lilinamofifi luga'amagi enali hiti keke'i lu baga ilana'mu yabe. To lugufa nekisa'a mone'auba bati huto minenogomo luga'a silaga'magi enegelo bi su hete enegelo bilana'mu yabe.

<sup>27</sup> Ma suhi huto ni'ibe. Lenali asaga'i li nupa hite Kilisitohi gufa'a legi huto moneko'na lolo hite kele kele'i hi etete nehabe. <sup>28</sup>Lali Kilisitohi naga'a lolo nohuta bona'magita ma huto nohune. Hu'mamofifi naga'a lalitoga ana huto enele'mo eto higo nehabe. Yata'a luga'a aposolo lele'mo eto hulago lali foya ti'ehibe. Yaloti limito Hu'mamofifi ka'a lu yege hose bomofifi bagaguti kaga lu huto hulata bo. Analoti limito Hu'mamofifi ka hapa'a enelepise bo amuya suhi fato fato'mofifi li'ahana bo, enele'mo eto hu'ehina. Analoti limito topa hose nasanamofifi lolo hu'ehina bo to amuya'aloti epesina bona'i enele'mo ye kose bo hiti to enehe'malata bo to foya kaba bo to fato fato enonogoguti fa'mene kaga lu huto hilata bo, enele'mo eto hu'ehina. <sup>29</sup>Lali asaga'i aposolosigo lele'mo eto hu'ehina ni'ifihe? To lali asaga'i ka'a yege hose bagaguti kaya lu huto huto bonago hiti lele'mo eto hu'ehina ni'ifihe? To lali asaga'i mono ka hapa'a enelepise bonago lele'mo eto hu'ehina ni'ifihe? To fato fato topa hose nasanamofifi suhi li huto hilata bonago lele'mo hu'ehina ni'ifihe? O'e, o'e, ya huto meni'ibe. <sup>30</sup>To epesina bona'i enele'mo ye kelata bonago lele'mo eto hu'ehina ni'ifihe? To fato fato enonogoguti fa'mene lu huto hilata bonago lele'mo eto hu'ehina ni'ifihe? To enali enonogoguti lu hokolo hite lu neepina bonago lele'mo eto hu'ehina ni'ifihe? O'e, o'e, ya huto meni'ibe. <sup>31</sup> Ya'mu lenali mono kamofifi amuya'a tito nina'a lilune lite amuya malalo.

To nani amuya nasanamofifi kapo lamana'a enebe ligilanamofifi ka'a lenelepilugi kehelilo.

**Lemehi epito enehe'molata ka**

**13** <sup>1</sup>Nani niginaga mefise nohuto bona'magihi enonogo'anigutifi to agelo bona'magihi enonogogutifi mono ka lutita nani fa'mene minotine. Ya'ma fa'mene pepe notina nasana belo nogo ya suhi huto fa'menena lolo hutine. <sup>2</sup>To nani Hu'mamofiji ka lu huto huto hulata bo lolo huto huto'ni Hu'mamofiji suguna ka'a yamofiji keheli su ho'ohuto'ni to Hu'mamofiji kamofiji nekisa mokisa'a hiti keheli su hoto nohuto'ni to nani linogo kosa mone li sibi hu he'milibe luto keheli ule'ale hu'ohuto'ni niginaga mefise fa'mene minotita fa'menena lolo hutine. <sup>3</sup>To ana'ina asaga enumuhi meni'ina bona'i enehe'malube luto fe'noha'ni he'mi su holoto to enali kumu luto nugufa logogu he'miloto'ni niginaga mefise fa'mene minotita fa'menenamo ni'inago ya nasanauba nele'mo bati mehitita'mu yabe.

<sup>4</sup>Eniginaga fise nehilana bona'magi enipakafa mehese agoya hite minalune'mu habe. Enali siko mehise enali'ani'mu kehelinogo metinogo enali'ani enigi'ani lelite metilana'mu li saga mehilune'mu habe.

<sup>5</sup>Eniginaga fise nehilana bona'magi enali bebe mesose hapa'ani melise, yogo fe'nohi li pili mekose, hipa mehi epelese, bona'magihi foipana lu gehe meli epelese, <sup>6</sup>foipa nasanauba i futili nehinogo enegelo mebise, lamana'amofiji nasanauba i futili nehinogo enipagu bati huse'na kehelilune'mu habe. <sup>7</sup>Eniginaga fise nehana bona'magi enali keta'a hiti nasana fa'mene kosele'ani meenehenogo kofilana'mu yabe. Anal'ina'mu asaga'i kehelite amuya melete minalana'mu yabe. Komopa'aniguti Hu'mamofiji agoya hu emite enifita ite minete Hu'mamofiji kagu amuya melete minomo buto minalana'mu yabe.

<sup>8</sup>Eniginaga fise nasana ya'ma su mehose minoba minoba hilina'mu yabe. Hu'mamofiji baga'aguti lu huto hulata ka yamofiji su halina'mu yabe. To fato enonogoguti lulata nasana ya'ma su halube'mu hibe. To kaga fato fato'mofiji hapa'a kehelilatana hiti ya'ma su hoto fenene hilina'mu yabe. <sup>9</sup>Ka hapa'a kehelilatana hiti lu huto hulata ka lulata nohuta yamofiji ifo haya'alo ni'ibe. <sup>10</sup>Minoto alih'a ya'ma minoba minoba nasana hapa'alo huto nohinogo ifo haya'alo ni'ina nasana su hoto fenene hilina'mu yabe.

<sup>11</sup>Nani yagapan'a'i inapuhi lolo huto minoto inapu ka luto mino'ohuna, to inapupagi kehelilata nehana enegekesa kehelito mino'ohunamo yata'isi ya'ma olopa bo lolo huloto'ni, yagapan'a'i inapupagihi nasana ahe'mi'ohube. <sup>12</sup>Ana suhi huto yatai kana'a kehelilata nohuna ya'ma gapo gapo'uba lokaba labaga li gelehe higo bu goto bu go fe luse mehu'ohuta ya suhi huto ni'ibe. Aliha'a ai bulo bu genogo ai bulo bu genogo huto bu galune. Yatai kana'a kehelise'na hiti mone kegi'a anasi keheli'ohune. Alihi kana'a keheli su halune. Alihi'a yamofiji legeya'a

lamana'a lubulo huto hinogo Hu'mau lali hapati keheli su ho'ehina ya suhi huto lali bu goto keheli fe luto kehelilune'mu hune.

<sup>13</sup>To minoba minoba hilana nasana ya'ma yabe. Hu'mamofitoga keheli amuya nomolota to huto hilina'a sa sa huto geba nohuta to liginaga fise nohuta yamofiji nasana loebe monebe nehanaya liginaga fise nohuta yamofiji le'mo kohe to'ehibe.

**Hu'mamofiji bagaguti kaga beto hu epilata nohutauba tito ni'ibe**

**14** <sup>1</sup>Ya hu'ehina'mu lenali bona'i leniginaga fi epelete enehe'malune lite nelitemo amuya malalo. To analo'i Hu'mamofiji Sikalafu'a nolepina amuya luga'a lilune lite nelitemo amuya malalo. Ya hite nehite Hu'mamofiji bagaguti ka'a lu huto hilata nasana'muko kehelinogo tino. <sup>2-3</sup>Luga'amagi fato enonogoguti fa'mene ana'asi lilata nehana ya'ma bona'i lu meepise Hu'mamofiji lu emilata nehabe. Enali ya'ma Sikalafu'uba enele'mo batu hu'ehigo Hu'mamofiji suguna ka'a nelago bona'i luga'amagi keheli negi nelata nehanaya, Hu'mamofiji bagaguti kaga'a lu huto nehana enali bona'i monolugu enele'mo olopa hilata nehabe, to enele'mo amuya melelata nehabe, to enele'mo ba yegelata nehabe. <sup>4</sup>Fato enonogoguti ana'asi lilata nehana enali komopa'ani le'mo hetofa hilata nehanaya Hu'mamofiji bagaguti lu huto hilata Hu'mamofiji kagu nehanamagi enele'mo hofa telata nehabe.

<sup>5</sup>Lenali fato enonogoguti lilana hapa'a li su halabe luto keheli'ohunaya, Hu'mamofiji bagaguti kaga'a li huto hilana'mu yabe luto kehelinogo tilina'mu yabe. Hu'mamofiji bagaguti kaga'a beto hilata nehana bona'magi fato enonogoguti lilata nehabe ya'ma enebe ligi'ehibe. To fato enonogoguti nelinogomo to bo moneuba ka'ani lu gelehe huto lu hokolo hilina bo nohinogomo ana ka nelanauba asaga bona'i Hu'mamofiji kagalugu enele'mo hofa talabe. <sup>6</sup>Nalalu'nigita, nani lenalitoga nobugo Hu'mau lu huto huto lu nimi'ehina ka'a to mono ka hapa'a mone luga'a to komopa'nigu keheli'ohuna ka'a to Hu'mamofiji ka'a komopa'niguti beto huto lenelepise ka'a lu huto hu nolepito fato enonogoguti kaga lu nolepinogo yanauba hena hena huto fi hele hu lepalalibe?

<sup>7</sup>Fa'mene nasana sipilohi yamofiji hetofa lite fu melinogomo ya hena huto nogo sipi malalina kehelilune. <sup>8</sup>To ufehi enonogo'a batu huto fu melilana ya'ma henana'mu kehe noibe lite bite luba hilana nasana le'mo batu mehilana'mu yabe. <sup>9</sup>Ana suhi hite lenali fato nogoguti lilana yamofiji bona'i luga'amagi hena hena hite kehelilabe. Fa'mene fato enonogoguti nelinogo kagatini yamofiji habafahuba li sibi saba hinogo fa'menena lolo hilube'mu hibe. <sup>10-11</sup>Negekesa keheliluna noto noto fato fato enonogo ni'ibe, to keheliluta kamogo ni'inaya, fa'mene nani enonogo mone keheli sibina hiluna ya'ma enonogomofiji afo'afu nani kumu kehelito fato hepato bo lolo hiluna'a hube, to nani ana suhi huto ai kumu

kehelito fato hepato bo lolo hilina'a nohibe. <sup>12</sup>To lenali hapatini ana suko huto ni'ibe. Sikalafu'mofifi amuya lenalitoga huto hilibe lite amuya melelata nehanamofifi bati huto ni'inaya, Yesuhi naga'a Hu'mamofifi enele'mo hofa talabe litemo amuya malalo.

<sup>13</sup> Ya hu'ehina'mu fato enonogoguti kaga fa'mene ana'asi lilana bona'magi hapa'a bati hiletu lu hokolo hite lu epilanamofifi amuya lilune litemo Hu'mamofitoga kehe ilabe. <sup>14</sup>Nani fato enonogoguti Hu'mamofitoga lilunamofifi nipa'niguti tinogo lilube'mu hube. Negekesa'niuba nasana lamana'a li huto mehilina'mu yabe. <sup>15</sup> Ya hu'ehina ya'ma hena hena hilube? Ya suhi hinogo bati hilube'mu hibe. Sikalafu'uba komopa'nigu babahi higo nani Hu'mamofitoga loka nohago negekesauba keheli fe nolinogo nabagatu lu huto hilube. Sikalafu'uba komopa'nigu mono nama hiti noligo ana huto negekesauba keheli fe nolinogo nabagaloti lilube. <sup>16</sup> Ya mehiluta ya'ma kai komopakatuko Hu'mamofifi fokehi halube luto lilata yamofifi kaitogati ya suhi keheli bati mehilata bona'i luga'amagi kai kaka mekehelilana'a ni'inaya enali hena hena hite lama'naka yabe lite lilabe. <sup>17</sup>Kai Hu'mamofifi fokehi lamana'a lilata'a hetofana hiti kalalukafu ya'ma keheli bati mehinogo hena huto komopa'a le'mo hetofa hu etalibe?

<sup>18-19</sup>Fato enonogoguti kaga lulatana yamofifi nani ya'ma babu luto lulata lenebe ligitu lulata nohubu. Ya hu'ohuna'mu Hu'mamofifi fokehi lilata nohunaya, nani ya'ma kehelinogo lamana'a lolo hitine. Li gehesagu fato enonogoguti kaga yatamalo lilube lutomo fa'mene lutita ni'inaya nani ya'ma kehelugo nolimibe. To komopa'ni negekesatu keheli fe luto bona'i enele'mo bati bati hilube luto ya'ma mono ka loesimo lu epilatana'mu yamofifi kehelugo notibe.

<sup>20</sup> Nalalu'nigita, fato enonogoguti kaga lulatana'mu yagapana inapupagi suhi hite minete foipa hapa'a mekehelilo. Ya hite, minalanaya yagapana inapupagi kehelise'na hiti meminalo. Enali kaga keheli fe menelibe. To lenali kaga kehelite le'mo fe lilune lite ya'ma olopa bona'magihi kehelise suhi lilo. <sup>21</sup>Mono bukugu kaga mone ma lite fayahi keye'ahana:

Sipi Bouba ma luto nolibe:  
 Nani mone fato hepatoga bona'i  
 enele'menogo  
 enali ete ma bona'magihi  
 ya'ma fato enonogoguti  
 nani nabagaguti kaga lu epilanamoya  
 fa'mene ka'ni mekehelilana'mu yabe.

<sup>22</sup>Anamofifi luga'a ka lilugi kehelilo. Fato enonogoguti kaga sibigopa lulatana yanauba Hu'mamofifi ka keheli'ahana bona'magi kumu luto babeyafa'a huto menohibe. Hu'mamofifi ka mekehel'i'ahana bona'magi topa halabe luto babeyafa'a ni'ibe. To Hu'mamofifi bagaguti ka'a bati

huto lu huto hu epilata'a yanauba Hu'mamofifi ka mekeheli'ahana bona kumu yabe lutomo meni'ibe. Hu'mamofifi ka kehel'i'ahana bona'magihi ya'ma lufusa'ani ule'ale hulata ni'ibe.

<sup>23</sup> Ya hu'ehina'mu lenali asaga'i Yesuhi naga'a li nupa hite fato enonogoguti kaga lite nelinogo, yamofifi kana'a mono ka mekeheli'ahana bona'ifi to fegutoga bona'ifi tite kehelite negi nagi nenabe lite kehelilune'mu habe. <sup>24</sup>To Hu'mamofifi bagaguti ka'a bati huto lu huto huto nehinogo, Hu'mamofifi mekeheli'ehina bofi, fegutoga nehana bo moneuba lenalitoga tito ka kehelilube'mu hibe. Ya hilinauba ya'ma asagato foipana'amofifi hapa'a lu huto hi etete ka foyagu le'mo malalana'mu yabe. <sup>25</sup>Ya hilengo komopa'agu nasana fala kito ni'inamofifi huto hilengo ai mino fe luto melugu golaga fito minoto Hu'mamofifi lahupa fi emitto Hu'mau lama'naka lenalitoga nohibe luto lilube'mu hibe.

### Mono kamofifi nasana neheti su hoto nehetino

<sup>26</sup>Nalalu'nigita, ya hu'ehina'mu hena hilune? Lenali mono kamu'i li gehesa hilune lite nehitemo ya'ma Hu'mamofifi kagagu lenele'mo moneko moneko'i hite hofa talanamofifi hapa'a ya'ma hilata nehabe. Moneuba mono nama lelito olata nohibe. To moneuba kaga giyaka lito lu epise kaga lelito olata nohibe. Moneuba Hu'mamofifi bagaguti kaga'a fato fato'mofihi lelito olata nohibe. Moneuba fato enonogoguti lulatamofifi lelito olata nohibe. Moneuba fato enonogoguti lu'ehina kagamofifi hapa'a lu hokolo hilinamofifi lelito olata nohibe. Ana suhi asaga lilana Yesuhi naga'a enehe'moto amuya molo epalalibe lite ya suhi hilo. <sup>27</sup>Fato enonogoguti kaga lilana yamofifi asaga bona'magita melilo. Loefi loeyagi moneyagifi enalisigo ya suhi lite moneko moneko nelinogo moneuba hapa'a lu gelehe huto lu epino. <sup>28</sup>Mono kagu li gehesa hite nehitte hapa'a lu gelehe huto lu epilina bo mone menehinogomo to moneuba fato enonogoguti lilube'mu nohuto'amo ai kaga luse mineno. Ai'asigo monetoga nohuto ai'a ka hiti to Hu'mamofitoga lino. <sup>29</sup>To Hu'mamofifi bagaguti kaga ya'ma bona'i loemofi, loebe monebefi enali lu huto hite lilune'mu nehinogomo, luga'amagi enali nekehelite kaga'ani loko hite kehelilana'a legeso hite minalabe. <sup>30</sup>To li gehesa hi'ahanalo mone bouba legeso huto nohigo Hu'mamofifi Sikalafu'uba komopa'agu yuhufa kaga emigo lilube'mu nohutomo kohe toto lilina bouba ya'ma fa'mene nohinogo lino. <sup>31</sup>Ya hite, Hu'mamofifi bagaguti kaga lilune lite nehitemo, fa'mene lu su halabe. Ya nehitte moneko moneko lilenogo, luga'a enali mono ka kehelinogo komopa'ani babahi hilibe. <sup>32</sup>Hu'mamofifi bagaguti kaga lu huto hilana bomagi lu huto hilana'mu kaba hite minalabe lite li'ahanamo ni'ibe. <sup>33</sup>Hu'mau ya'ma le'mo sibi sibi hilina nasanamofifi afo'afu menohibe. Ai'a lele'mo fu luto minalina'muko ekesa kehelilata nohina afo'afu nohinagihe.

Kilisitohi naga'a asaga'i mono kalo li nupa hite nehago ya'ma  
 34 ana'magi enali kaga melise fa'mene mineno. Ana'magi ana li gehesagu kaga lilana meni'ibe. Ana'i ana suhi hite kaba bo meminalabe luto Moseu keya ka lu'ehina kagu ya'ma limite minalabe lutomo ni'ibe. 35 Enali mono nasana mone kumu loka halune lite nelitemo noha'aniluga minete baha'animagihi enoloka henogo lu keheli fa keheli hilabe. A'i moneuba mono kalo li nupa hi'ehilanagu kaga lilinamofiji lubuya huse nasana ni'ibe.

36 Hu'mamofiji kaga'a lenalitogati hapi huto hulago ya suhi lilata nehafihe? To lenalitinisigo keheli'ahana ni'ifihe? O'e, ya huto meni'ibe. 37 Lenalitogati moneuba ai'amu kehelinogo, mono ka lu huto hulata bo lamana'a lolo hilina to komopa'agu Sikalafu'a hiti bo lolo hilina ya'ma, ka fayah i koyoto nolepuna asaga'i yamofiji Sipi Botiuba lu molo'ehinamo ni'ibe luto kehelino. 38 Bona'i moneuba ya'ma kaga keheli he'milina yamofiji ai kaga'a mekehelilo.

39 Ya hu'ehina'mu nalalu'nigita ma lite kehelilo. Hu'mamofiji bagaguti kaga li huto hilune litemo amuya malalo. Fato enonogoguti fa'mene ana'asilo lulatanamofiji o'e lite meli epalalo. 40 Mono kumu li nupa hite minete ana'ina silaga'i hite melete hilana yamofiji lamana huto legeso huto bu baga ino.

### Yesu fili'ehinagutti ho ti'ehinamofiji ka'a

**15** <sup>1</sup>Nalalu'nigita ka lamana'a alu lepugo keheli'ahabe. Ana kagamo aku'i lu lepilube. Giyaka giyaka fito lu lepugo lite lufusatini alolo hu'ehinamo ni'ibe. <sup>2</sup>Lenali ana ka lamana'a lu lenelepi'ohunamofiji li pili kete li'ehinogomo ya'ma le'mo ye ko sibina mehu'ehinogomo ya'ma, lenubuto bilube'mu hibe.

<sup>3</sup>Mono ka tito ni'ina ka'a lu nimi'ehina'asigo lenali'i lu lepito ma luto lu lepi'ohube: Kilisitou lali foipanati'mu fili'ehina ya'ma mono bukugu ai ana hilibe lite koyapa'i emasana keye'ahanamo ni'ibe. <sup>4</sup>Filigo keli hete'ahana mono bukugu li mele'ahana kana'a loebe monebe keligu minoto mopo huto ho ti'ehina. <sup>5</sup>Ho tiloto kohe toto buto Pitahi huto hu be li'ehina, analoti buto Pita hiti pana'alobo luga'a 12 asagatoga huto hu enebe li'ehina. <sup>6</sup>Analoti bona'a naga'i 500 enali li nupa hite nehago analo huto hu enebe ligo be ge su he'ahana. Enalitogati asaga enubu hiti nehanaya mone'a fili'ahana ya'ma kanagu nokoyobe. <sup>7</sup>Analoti gona'a Yemesihi huto hu be li'ehina analoti aposolo asaga'i huto enebe li'ehina.

<sup>8</sup>Alihi ya'ma nani mone fato kanagu neketo'ehina pana tegi huto nohugo huto hu nebe li'ehina. <sup>9</sup>Nani aposologuti limito nohubo. Nani Kilisitohi naga'a kalana'i molo epoloto enohoto hu'ohuna bo aposolo yabe luto nig'i'ni mololago nelesa'ni ligo nohubo. <sup>10</sup>Nani aposolo lolo huto nani hapa'ni fato fato huto ni'ina yamofiji Hu'ma komopa'a hokolo hina boubba

lu netago lolo hu'ohube. To ai komopa'a batu hina boubu aposolo lili'nalo nele'mo malago fa'mene lolo mehubu. Nani foya li'ohuna yamofihu aposolo luga'a enebe ligitu li'ohuna yabe. To nani hena'niloti lutine? Hu'ma komopa'a batu hinauba nanitoga minago li'ohube. <sup>11</sup>To nani foya lito lu huto huto lepi'ohuna ka ni'ifi to aposolo luga'amagi foya lite lu huto huto lepi'ahana ka ni'ifi, moneko ka ni'ibe. To lenali kehelu ule'ale hi'ahana ka moneko'na ni'ibe. Fato fato ka meni'ibe.

**Yesu fili'ehinguti ho ti'ehina'mu lali hiti ana huto ho tilune'mu hune**

<sup>12</sup>Kilisitou ya'ma fili'ehinaguti ho ti'ehina ka ma luto lu noleputogomo lenalitogati luga'amagi henabe luto fili'ehilana bona'i aku'i ho tilana meni'ibe lite lilata nehabe? <sup>13</sup>Ya'ma fili'ehilana bona'i aku'i ho tilana meni'ibe lite nelana kaga yamofihu lamana'a meni'ibe. Ya huto lamana'a ni'itita Kilisitou fili'ehinaguti ho metitine. <sup>14</sup>To Kilisitou ya'ma ho metitita mono ka noluta ya'ma fa'mene'mu lutogo lenali fa'mene'mu lenifita ite minatine. <sup>15</sup>To mone hiti ni'itita'mu yabe. Lali Hu'mamofi kumu lu'ohuta ya'ma ai'a Kilisitou fili'ehinaguti le'mo ho ti'ehinamo ni'ibe luto lulata nohutaya filise'naguti le'mo ho metise nasana ni'itita Kilisitohi Hu'mau le'mo ho metitine. To yamofihu kaga'a lu'ohuta ya'ma Hu'mamofi kumu lu'ohuta ka faga faga lutita'mu yabe. <sup>16</sup>Fili'ahana bona'i ho metilabe luto ka ya'ma lamana'a meni'itita, Kilisitohi le'mo ho metitita'mu yabe. <sup>17</sup>To Hu'mau ya'ma Kilisito fili'ehinaguti le'mo ho meti'ehina ka'a lamana'a ni'itita lenali lenifita neitita kagauba fa'menena lolo hitita'mu yabe. Hena'mube? Lenali foipanatini ya'manauba minatita'mu yabe. <sup>18</sup>To Kilisito kumu kehelu ule'ale hilata nehana fili'ahana bona'i haya kalatita'mu yabe. <sup>19</sup>To lali Kilisitou yatai ma melugu nohuta kana'asigoko lele'mo batu hilina ni'itita bona'i luga'a asaga'magi lali kumu kehelite keke'i nelinogo ate ate luto minutita'mu yabe.

<sup>20</sup>To ya huto meni'ibe. Kilisitou ya'ma lama'naka fili'ehinaguti aho ti'ehina yabe. To ho notito fili'ahana bona'i ana hite tilabe luto kohe toto ti'ehina. <sup>21</sup>Ya'ma hapa'amofihu ma ni'ibe. Bo mone Atau ai fililata nasana le'mo kohe to letoto fili'ehina ana suhi huto fato bo moneuba Kilisitou fili'ehilutaguti ho tiluta nasana le'mo kohe to letoto ho ti'ehina. <sup>22</sup>Lali asaga'i Atahi naga'a nohuta yagi asaga'i fili su haluta'a huto nohune. To ana suhi huto lali Kilisitohi naga'a nohuta bona'i asaga'i keliguti ho ti su halutamo ni'ibe. <sup>23</sup>Fi lehe tete ho tilabe luto lu leto'ehinalo ho tilune'mu hune. Kilisitohi le'mo kohe to letoto ho ti'ehinamo ni'ibe. Alina kana'alo ya'ma ai naga'a lali ho tiluta'mu yabe. <sup>24</sup>Analoti aliha'a minoto asaga'na su halina kana'a huto hilibe. Ana kanagu Yesu ai'a enighiti bo to sipi kaba bona'i hiti to Satahi amuya bo'a enali amuya lelito limi su holoto ya'ma me'i kai kapoka yabe luto afotifu Hu'mamofihu yanugu melelenogo kaba nohinogo kana'a su halina'mu yabe. <sup>25</sup>Yatai ya'ma Kilisitou foya'a

lito kaba huto mino lito nobinogo Hu'mau fateha'amagihi gi fehupa'aga enele'mo malago foya'a li su halube'mu. <sup>26</sup> Ya huloto yalo fatehati bo sipi'a ho fililube'mu hibe, gi'a ya'ma filise nasana yabe. <sup>27</sup> Yamofifi mono bukugu ma lite fayah keye'ahanamo ni'ibe: *Hu'mau bona'i hiti to ana'ina asaga'i ya'ma ai'a gigusa'aluga lele'mo molo su halina'mu yabe.* Ana ka ya'ma kehelilete Hu'mamofi kumu hiti lu'ehina kaga ni'ifihe lite mekehelilo. Hu'mau ai'a Kilisitohi gigusa'aluga lele'mo nupa hulata nohibe. Ai ya'ma Kilisitohi gigusaluga meminalina'mu yabe. <sup>28</sup> Hu'mau ai'a bona'i hiti to ana'ina silaga'i ya'ma pana'amofifi gigusaluga lele'mo nupa hinogo pana'auba ai afo'afifi gigusaluga minoto agoya hu etalibe. Ya hulenogo afo'afu minomo tito lebe ligi su halina'mu yabe.

<sup>29</sup> Lenalitogati luga'amagi fili'ahana bona kumu yabe lite mono nagami'i felelata nehabe. Fili'ohutaguti ho tiluta'a meni'itita ya'ma henabe lite nefalabe? Lenali fili'ahana bona'i luga'amu lenegekesa kehelite nagami'i folo epolo'ahana, keliguti ho tilata'a meni'itita henabe lite ya hi epelelata habe? <sup>30</sup> To fili'ohunaguti ho tise nasana'mu keheli amuya memolo'ohutita nani henabe luto ya'ma noho fililuta nasanamofifi gupisalo keta'a hiti asaga yupahi nominobe? <sup>31</sup> Nalalu'nigita, Sipi Boti Yesu Kilisitou ai'a nani lili'nagu lenele'mo molo'ehina yamofifi keheli'ohuto'nii Hu'mamofihi bulo ma luto nolube kana'amu kana'amu fililuta nasanauba lifito ago nominobe. <sup>32</sup> Nani ya'ma Efeso hepatoga lopi yagakafa legi hite nehana bona'i hiti luba fito mino'ohuta yabe. To bona'magih ka'aniya nani ya huto fililuta nasanalugu mino'ohunamomu'i ya'ma henana lamana'a huto hu nimilibe? Fili'ohutaguti ho tilata meni'ilina yamofifi nani ya huto mino'ohunanauba fa'menena lolo hilibe. To fili'ohutaguti ho tilata meni'ilina'a yamofifi lenalitogati bona'i luga'amagi ma lite ligo bati hitine: Yago fililuta ni'igi yatai nose'na yaga hoto nagami'i hiti laba lona noto minalune.

<sup>33</sup> To ya huto meni'ibe. Bona'i mone'amagi ya'ma kaga lilata enali lenele'mogopa hi lalagi ya'ma enali ka'anilo nolube. Sibi humofa'na nehana bona'magitoga bite i ke'malana bona'magi enali komopa'anigu ana hite sibina hilana'mu yabe. <sup>34</sup> Lenali ya'ma komopatini hokolo hinogo eto hite nehit foipa nasana lenemegesa hi emilo. Lenalitogati bona'i luga'amagi Hu'ma kumu menekehelibe. Yamofifi fa'mene kehelinogo lenubuya hilibe luto nolube.

#### Filise'naguti lugufati kosaba'i lolo hinogo ho tise nasana

<sup>35</sup> To luga'amagi ma lite lilabe: Fililago pata si'ehina bona'i enali hena hena hite ho tilanabe? To enugufa enokaba henana tegi hinogo huto hilabe? <sup>36</sup> Ya'ma kaga sibigopa negi ka nelabe. Lenali nose'na notina hapa'a nekeheliye? Lenali nose'na bigaha'a lite he kefelata nehanamofifi fa'mene ana'asi tilina meni'ibe. Filito sekuya biloto yalo

boloto tilata nohibe. <sup>37</sup>Biha'a nasana ya'ma fato suhi huto ni'ibe. To nose'na ya'ma fato huto ni'ibe. Moneko okaba hiti meni'ibe. To legeya'a kile'i ni'ina to fato nose'na ni'ina biha'ago he kololata nohune. To he kololotogo notina'a haya'a hiti ya'ma alisha'a huto hulata nohibe. <sup>38</sup>To Hu'mau ai keheli fe luloto lu eto'ehina'a huto gufa'a emi'ehinalo ana suhi huto boloto tilata nohibe. To legeya'a ana huto noha'a ana suhi huto fato fato'mofifi huto hulata nohibe.

<sup>39</sup>Lugufamofifi hapa'a ana huto moneko'i meni'ibe. Bona'magita lali lugufati ana huto fato'i to yagakafamagihu enugufa fato'i, to namamagihu fato'i, to faya'magihu ana huto fato'i ni'ibe.

<sup>40</sup>Kokulumagu nasana silaga'i ni'ina to metoga ana huto ana'ina silaga'i ni'inaya, kokulumagu nasana silaga'i ni'inamofifi sekele mamu'a fato'i to metoga ni'ina ana huto sekele mamu'a fato'i ni'ibe. <sup>41</sup>Yegemofifi silikeha'a fato'i, ikahi ai silikeha'a fato'i, sonofili enali ana huto silikeha'ani fato fato ni'ibe.

<sup>42</sup>Filise'naguti ho tilatanamofifi hapa'a hiti ana suko huto ni'ibe. Lugufa keli halatana yamofifi fa'mene pata sise'na ni'ibe. To lugufa gololo tilina'a yamofifi pata mesise minoba minoba huto su mehalina'mu yabe. <sup>43</sup>Keli hose'na ya'ma futu'a ni'ibe. Gololo tise nasana ya'ma silikeha'a hiti ni'ibe. Keli hose'na ya'ma lapa mebinana ni'ibe. Gololo tise'na ya'ma amuya'a hiti ni'ibe. <sup>44</sup>Keli nohota nasana ya'ma me'mofifi lugufamo ni'ibe. Gololo tise'na ya'ma kokulumamofifi lugufati ni'ibe. Me lugufa ni'ina ana huto kokulumagu lugufamo huto hilibe. <sup>45</sup>Ya hu'ehina'mu mono bukugu ma lite fayahi keye'ahanamo ni'ibe: Yege bo Atau ya'ma meha'a hiti lolo huto minolata hu'ehinamo yanamofifi afo'afu lolo huto mino'ehina. To alisha'a Ata tegi bo gi'a Yesu ai'a amuya moloto minoba minoba hilutanamofifi afo'afu lolo huto mino'ehina. <sup>46</sup>Ya huto ni'inaya kokulumaguti lugufa kohe toto huto hilina meni'ibe. Metoga lugufamo ya'ma kohe tolago kokulumaguti lugufa ya'ma alihia huto nohina yabe. <sup>47</sup>Kohe toto melugu bo Atau ai ya'ma metoti lolo hu'ehina, ya hu'ehina'mu luto melugu bo mino'ehina. Alihi Ata tegi bo Yesu ai ya'ma kokulumaguti bo limito mino'ehina. <sup>48</sup>Melugu bo mino'ehina babeyafa huto metogati yagapan'a nohune. To kokulumaguti bo mino'ehina babeyafa huto kokulumaguti nasana lali minalune'mu hune. <sup>49</sup>To metogati ai meha'a li'ohuta ana huto kokulumagu bomofifi ai meha'a lilune'mu hune.

<sup>50</sup>Bogiyo, kaga mone'ya lilugi kehelilo. Me lugufatu Hu'mamofifi kapogu mebiluta'mu yabe. To fulupa ito fa'menena lolo hilina lugufauba nasana amuya'a hiti minoba minoba huse nasana mone melilinamo ni'ibe.

<sup>51</sup>Kehelilo. Nani suguna ka mone lu lepilugi. Lali mone'a fili su mehaluta ni'inaya asaga'i nominana'a hiti fili'ahana'a hiti lali fa'mene

li gelehe huto kosaba lugufamofih i asaga'i lito i kololo bi su halutamo ni'ibe. <sup>52</sup>Aliha'a su halina kana uefepo neinogo fili'ahanamagi ho tilet fulupa ite tuguma'i mebilana'a minalana'mu yabe. To lubu noha'a fili koto nohiluta'a hiti mele'isi i gelehe huloto fato lugufa lito i kololo bilutamo ni'ibe. <sup>53</sup>Lugufa ya'ma fulupa ite tuguma'i bilata nohina nasanauba amuya moloto minolata nohina nasana ya'ma gukete suhi huto lito i gololo tilube'mu hibe. To filise'namofih i lolo hu lalutigi minoba minoba nasana lito i gololo bilibe. <sup>54</sup>To fulupa ilata lugufaub minoba minoba huto minose'na lito i kololo bilina yupahi kaga ma luto mono bukugu koyo'ehinamo huto hilube'mu hibe: *Minoba minoba nasanauba fililata nasanamofih be ligil'ehinamo ni'ibe.* <sup>55</sup>To ka mone hiti ni'ina:

Fililata nasana  
kai loho fililata nohata  
amuyaka hiya ni'ibe?  
Fililata nasana kai ufehakatu  
lele'mo lagabu'i gise nasana  
hiya ni'ibe?

<sup>56-57</sup>Foipa nasanauba ya'ma fililata nasanamofih ufehe neka'a lolo hu'ehibe. To keya ka li'ahana kaga'mu yabe luto foipa nasanauba lelepito amuya hiti lolo hu'ehinaya Hu'mau ai Sipi Boti Yesu Kilisitohi lu emilago foipa nasana be ligilata nohina amuya limilata nohinagi, ya'mu fokehi nolune.

<sup>58</sup>Ya hu'ehina'mu nalalu'nigita, lenali amuya melete ho ti kibi kibi hite ule'ale hite minalo. Ya nehite Sipi Bomofih foyagu kana'amu kana'amu amuya melete lelite bilabe. Sipi Bomofi kumu yabe lite foya'a lelite binogo buto fa'menena lolo mehilibe lite nekehelite lilo.

### Yesu naga'amagih i efahi li nupa hilabe luto lu epi'ehina

**16** <sup>1</sup>To yatai lenali Hu'mamofih bona'magi Yelusale hepato nehana kumu yabe lite moni efahi li nupa hilabe luto lu lepilugi kehelilo. Galesia hepatoga mono bona'magih i lu epi'ohuna suhi hite hilo. <sup>2</sup>Lenali efahi nelina suhi hite ana legegeto kehelite fuli yupap salele napagu ya'ma luga'a fuku lite le'mo eto eto hite melete minalo. Fa'mene nehinogo buto nehe netinogo'ni efahi li nupa hilune'mu ligitagahi hi lalagi yatai li nupa hilo. <sup>3</sup>Lenalitoga binogo'ni bona'i mone'a enele'mo eto hilana bomagih i fayaha nasana epiloto enoho lifinogo'ni, li nupa hi'ehilana efahi ya'ma Yelusale hepatoga lelite bilabe. <sup>4</sup>To lenali kehelinogo batu hinogomo nani hiti moneka bilune.

### Polu enalitoga bilube'mu nohuto ka'a lu malago bu'ehina

<sup>5</sup>Nani Masetonia hepatogati bilube'mu nohunaya anaga buto'ni kana'a nesi'a minoto lenalitoga bilube'mu hube. <sup>6</sup>Lenalitoga buto kana'a nesi'a

minomo netinogo ko'mofihu kana'a su halina ni'ifihe? To kapoga nele'mo bati hilana ya'ma yagafi yagafi biluna'mu yabe. <sup>7</sup>Nani ya'ma yatai kana yamofihu fa'mene kapoga nobuto lenali'i bu lenogomo biluna yamofihu bati mehilube'mu hibe. Ya hu'ehina'mu Sipi Botiuba kehelinogo lenalitoga buto kana nesi'a minototi bilube luto nolube.

<sup>8</sup>Nani ya'ma Efeso hepatoga nohugo Yuta bona'magihi sipi nose'na nalana yupahi, gi'a Petikosu nelana, ana fuli su halina'mu yabe.

<sup>9</sup>Ya'maga Sipi Bomofihu ka'amofihu kapo'a bili etoto foya'ni huto higo nolugo legeya'a holata nohibe. To ka lamana'amofi kumu fatehe bo'a babu lite nehabe.

<sup>10</sup>Timotiu lenalitoga buto henetilenogo be tiginogo gufa'a gabu meginogo bati huto minalibe. To nani Sipi Bomofihu foya lilata nohuna ana suhi huto lilata nohibe. <sup>11</sup>Ai neheya kola nohina'mu lenali ai kumu kehelinogo melimino. Nani hiti nigibo nagabo luga'a hiti geba huto nohutagihe. Lenali legeso hite kaba hi etete ho lifinogo fulu fulu huto kapoga oba oba huto nanitoga o henetilibe luto geba nohubue.

<sup>12</sup>To lalalutifih Apolosihi ka'a lilugi, lalalutighi Kilisitohi bo luga'a enali hiti lenalitoga bilibe ekesa lito ho lifi'ohunamo ai yatai bilina'a babahi mehibe. Yata'isigo ni'igopa kana'a monelugu bilina kapo'a hokolo hileno lenalitoga bilube'mu hibe.

### Polu keke'i lu epoloto fayah koyo su ho'ehina

<sup>13</sup>Lenali kaba hite minelete Hu'mamofihu ka kehelilatanamofi kumu ule'ale hite minalo. Ya nehite koli mehise gimi bomofihu hapa'a lite amuya melete minalo. <sup>14</sup>To lili'na nasana silaga'i lilune'mu nehitemo komopatini ai emigo ai emigo hite lolo hilabe.

<sup>15</sup>To nalalu'nigitabe, mone lu lepilugi kehelilo. Lenali Setefanasi to lalameha'a enali kumu ya'ma lite keheli'ahabe: Enali Akaiya hepatogati kohe tete Hu'mamofihu ka kehelilete komopa'ani li gelehe hite Kilisitotoga keheli emi'ahana. To Hu'mamofihu bona'a enalitoga kele kele foya minalune lite liletate lilata nehabue. <sup>16</sup>Ya'ma lenali ya suhi nehana bona'i hiti to enali hiti Hu'mamofihu foya lite nehana bona'i luga'a hiti enemege'i malalo.

<sup>17</sup>Koliti bona'magi lenali kumu keke'i lu epoloto nohunaga Setefanasi hiti Fotunatas to Akaikasi enali nanitoga elago komopa'nigu nokehelugo bati nohibe luto negelo nobube. <sup>18</sup>Ya huloto'ni nani hiti lenali hiti asaga'i enali'i bu go lu mala huto nohutogo lipagu legelo bi'ohuta. Lenali bona'i ya hana'a enali kumu kehelinogo bati hino.

<sup>19</sup>Esia metoga Hu'mamofihu bona'amagi enali lenali kumu keke'i neli lepalago nolube. To Akuila to liha'a Pilisila etali nonugu mono kumu li nupa hilata nehana bona'magi enali Sipi Bomofi kumu yabe lite lenali kumu keke'i neli lepalago nolube. <sup>20</sup>Lalalutigita lenali kumu nehafihie

lite asaga bona'magi li'ahana. Lenalitini moneko moneko'i soso hi epelete minalo.

<sup>21</sup>Nani Poluita fayahi koyolata osahi nehe'mose bona'nimofiji yanuguti lito nani'ni keketini nolu lepoloto fayahi ya'ma nayaha'nitu koyo su nohobe.

<sup>22</sup>Moneuba Sipi Bomofiji mehi meemilina ya'ma Hu'mau gumi'i molo etelenogo yabalugu limilibe.

Nani Giliki kaguti: Malana ta, noluto lali kaluguti Sipi Botio kai obo, luto nolube. <sup>23</sup>Sipi Boti Yesu lehe'mose'na lenalitoga mino moloto mineno. <sup>24</sup>Komopa'niuba Yesu Kilisito kumu yabe luto lenalitoga minolata nohibe.